

Sultan tegas pelihara kesucian Islam

2

Terus amal langkah cegah Covid-19

5

PKNS pemaju rumah mampu milik terbaik

4

Taman tema air tumpuan pelancong

6

selangorkini

PERCUMA

PP 19570/07/2020 (035196)

EDISI 4 - 10 JANUARI 2024

www.selangorkini.my

Negeri kutip hasil RM2.7 billion

Pungutan pendapatan setakat 31 Disember 2023 itu mengatasi sasaran RM2 bilion. Hasil tersebut diagih semula kepada rakyat menerusi pelbagai bantuan kebajikan termasuk Iltizam Selangor Penyayang

MUKA 3

Jualan Ehsan Rahmah kembali 15 Januari

Program jualan murah diteruskan dengan tambahan produk termasuk beras import dan daging lembu segar untuk bantu pengguna membeli keperluan pada harga 30 peratus lebih rendah berbanding pasaran

MUKA 4



Dato' Menteri Besar Dato' Seri Amirudin Shari menyampaikan ucapan di hadapan ribuan pengunjung majlis Darul Ehsan Berselawat 3.0 sempena sambutan ambang Tahun Baharu 2024 di pekarangan Stadium Shah Alam pada 31 Disember 2023. Foto REMY ARIFIN ►BERITA MUKA 3

pancawarna

Sertai tuisyen percuma, raih banyak 'A'

Inisiatif pendidikan kelolaan Kerajaan Negeri asah pelajar menjadi cemerlang



9

Karya agung jadi rebutan di pesta buku

Naskhah terjemahan Siri Pencerahan Selangor angkat tradisi ilmu laris di pasaran



10

Artis gambarkan derita Palestin dalam warna

Colours for Gaza pamer lebih 100 karya



12&13

Noraini kini datuk bandar Klang

SHAH ALAM - Yang Dipertua Majlis Perbandaran Klang (MPK) Datin Paduka Noraini Roslan dilantik sebagai datuk bandar Klang berkuat kuasa 2 Januari.

Menerui Facebook Pejabat Setiausaha Kerajaan Negeri, penyerahan surat pelantikan dan amanat itu disempurnakan Setiausaha Kerajaan Negeri Dato' Setia Haris Kasim.

"Tahniah dan selamat bertugas diucapkan," maklumnya menerusi Facebook.

Noraini pernah berkhidmat sebagai datuk bandar di Majlis Bandaraya Subang Jaya.

Beliau juga menyandang jawatan yang dipertua Majlis Daerah Kuala Selangor yang kini berstatus perbandaran dari 2011 hingga 2017.

Pemegang Sarjana Perancangan Wilayah dari Universiti North Carolina, Amerika Syarikat juga berkhidmat sebagai ketua jabatan perancangan bandar di MPK dari 1989 hingga 2010 dan Majlis Bandaraya Petaling Jaya dari 2010 hingga 2011.

Edar kalender, dekati masyarakat

GOMBAK - Dato' Menteri Besar Dato' Seri Amirudin Shari mengambil peluang beramah mesra dengan orang ramai ketika mengendar kira-kira 1,000 kalender 2024 sekitar pasar Selayang Baru di sini.

Beliau menjelaskan amalan tersebut rutin setiap awal tahun untuk turun bertemu penduduk di lokasi tumpuan sambil meninjau prasarana di situ sekali gus memastikannya dalam keadaan baik.

"Program edaran mendapat sambutan sangat baik daripada penduduk hasil hubungan akrab bersama mereka sejak saya menjadi wakil rakyat 15 tahun lalu," katanya pada 1 Januari.

Ahli parlimen Gombak itu turut bersarapan selain mengunjungi peniaga pasar di tingkat bawah pasar berkenaan.

IMBAS DI SINI akbar digital minggu lepas



Teliti kewajaran sebelum mencadang

SHAH ALAM - Dato' Menteri Besar menjunjung kasih atas kebijaksanaan Duli Yang Maha Mulia (DYMM) Sultan Selangor Sultan Sharafuddin Idris Shah Alhaj melalui titah baginda terhadap cadangan ahli parlimen Beruas yang menyentuh urusan agama Islam.

Dato' Seri Amirudin Shari berkata Datuk Ngeh Koo Ham selaku ahli politik berpengalaman sewajarnya lebih berhati-hati ketika mengeluarkan kenyataan khususnya berkaitan hal ehwal Islam.

"Kewenangan pengurusan agama Islam yang menjadi prerogatif khusus sebuah negeri melalui payung ke bawah DYMM Raja Raja Melayu, sewajarnya

difahami tanpa sebarang dakwa-dakwi yang memungkinkan penyelewengan tafsir berlaku sehingga mencetus keresahan yang tidak perlu.

"Ahli parlimen Beruas selaku ahli politik berpengalaman, malah pernah menjadi Speaker Dewan Undangan Negeri Perak sewajarnya meneliti semula kapasiti pembicaraan beliau khususnya berhubung isu-isu melibatkan hal ehwal Islam, sementelah beberapa kali polemik yang berlebaran pada skop sama dicetuskannya terdahulu," katanya pada 30 Disember.

Amirudin berkata tindakan Koo Ham hanya membebani partinya yang pada

ketika ini berada pada tahap terbaik untuk sama-sama memperjuangkan agenda Malaysia Madani melalui Kerajaan Perpaduan.

"Upaya Perdana Menteri Datuk Seri Anwar Ibrahim yang istiqamah dan tegas dalam memperihalkan perkara berkaitan Islam dan hal ehwal Melayu perlu disambut dengan adab, bijak dan cakna oleh setiap ahli politik khususnya ahli-ahli Parlimen.

"Seyogia titah Baginda hadir tepat masanya sekali gus menjadi titik noktah kepada mana mana ahli politik yang gagal memahami realisme politik Malaysia dalam cakupan yang menyeluruh."

Titah tegas Sultan Sharafuddin

Jangan campur urusan Islam

Oleh NAEEM RAFFI

SHAH ALAM - Duli Yang Maha Mulia Sultan Selangor Sultan Sharafuddin Idris Shah Alhaj bertitah semua rakyat termasuk pemimpin bukan Islam diingatkan agar tidak mencampuri urusan hal ehwal Islam di Malaysia.

Selaku penggerusi Majlis Kebangsaan Bagi Hal Ehwal Agama Islam Malaysia (MKI), Baginda menitahkan demikian susulan cadangan Ahli Parlimen Beruas Datuk Ngeh Koo Ham agar pakar bukan Islam dilantik untuk membantu Jawatankuasa Khas Mengkaji Kompetensi Dewan Undangan Negeri (DUN) Untuk Menggubal Undang-Undang Islam.

"Baginda juga bertitah bahawa MKI,

yang dipengerusikan oleh Baginda, memegang amanah dan tanggungjawab bagi melaksanakan segala hal ehwal berkaitan umat Islam.

"MKI juga dianggotai oleh pakar-pakar yang arif dalam pelbagai bidang khususnya yang melibatkan undang-undang dan agama Islam," titah Baginda dalam kenyataan pada 29 Disember.

"Justeru, Baginda mengharapkan agar orang-orang politik khususnya yang bukan beragama Islam untuk tidak terus-menerus mencampuri urusan hal ehwal agama Islam. Malah, penganut agama-agama lain seharusnya mencontohi umat Islam yang tidak mencampuri hal ehwal agama lain di Malaysia."

Untuk menegaskan lagi titah Baginda, Sultan Selangor berkenan memetik ayat keenam surah al-Kafirun yang ber-

maksud: "Bagi kamu agama kamu, dan bagiku agamaku".

Kenyataan pemimpin DAP itu bagaimanapun dijelaskan Setiausaha Agungnya Anthony Loke yang menyifatkan Koo Ham terkhilaf dalam memahami persoalan tersebut.

"DAP menghormati kebijaksanaan Tuanku Sultan Selangor dalam membuat sebarang keputusan mengenai urusan MKI," kata Loke dalam kenyataannya.

"Masyarakat bukan Islam juga tidak perlu bimbang dalam perkara ini kerana jika sebarang pindaan undang-undang yang membabitkan hak bukan Islam, ia perlu diperhalusi dan diputuskan jemaah menteri dan seterusnya proses seperti biasa perlu dilaksanakan di Parlimen."

Elak timbulkan kegusaran awam

SHAH ALAM - Wakil rakyat serta pimpinan politik diminta berhati-hati ketika membuat kenyataan mewakili parti terutama isu berkaitan Perlembagaan Persekutuan.

EXCO Perpaduan Datuk Rizam Ismail menjelaskan tindakan sedemikian penting bagi mengelakkan kegusaran awam memandangkan keadaan sosial

dan realiti politik ketika ini.

"Ini sangat penting untuk mengelakkan kegusaran awam khususnya orang Melayu terkait dengan jaminan status quo seperti dalam Perlembagaan dan undang-undang tubuh Kerajaan Negeri.

"Saya menyeru rakyat Malaysia khususnya di Selangor untuk sama-sama menjunjung titah nasihat Duli Yang

Maha Mulia Sultan Selangor dan terus menghormati keluhuran Perlembagaan," katanya pada 31 Disember.

Beliau berkata Sultan Sharafuddin Idris Shah Alhaj selaku penggerusi Majlis Kebangsaan Bagi Hal Ehwal Agama Islam Malaysia (MKI) memiliki kebijaksanaan dan kepakaran undang-undang Islam.

Usaha tingkat pemahaman rakyat

GOMBAK - Kerajaan Negeri akan meningkatkan usaha memberi pererangan dan pemahaman kepada rakyat terhadap program kebajikan agar lebih ramai mendapat manfaat.

Dato' Menteri Besar Dato' Seri Amirudin Shari berkata tumpuan turut

diberi kepada pelaksanaan semua projek bagi memacu pertumbuhan ekonomi negeri.

"Saya ingin menyempurnakan tugas dan perancangan yang telah disusun sejak beberapa tahun lalu sebagai contoh memulakan pembinaan semula

Stadium Shah Alam.

"Selain itu, fokus saya juga melaksanakan program peningkatan ekonomi seperti projek Kawasan Pembangunan Sabak Bernam (SABDA) dan Wilayah Pembangunan Bersepadu Selangor Selatan (IDRISS)," katanya.



DIGITAL... Perdana Menteri Datuk Seri Anwar Ibrahim (tengah) melancarkan Pangkalan Data Utama (Padu) di Pusat Konvensyen Antarabangsa Putrajaya pada 2 Januari. Foto BERNAMA ► BERITA MUKA 18

Hasil tahun lepas atas sasaran

Rekod kutipan RM2.7 bilion

Oleh ZAREEF MUZAMMIL

SHAH ALAM - Selangor mengutip hasil RM2.7 bilion setakat 31 Disember sekali gus melebihi nilai sasaran yang ditetapkan.

Dato' Menteri Besar juga menjelaskan ekonomi negeri berkembang baik melalui Rancangan Selangor Pertama (RS-1) susulan pelaksanaan projek Kawasan Pembangunan Sabak Bernam (SABDA).

Menurut Dato' Seri Amirudin Shari lagi, projek lain termasuklah Wilayah Pembangunan Bersepadu Selangor Se-

latan (IDRISS), Gerbang Maritim Selangor (SMG) dan pelabuhan Pulau Carey.

"Alhamdulillah, tahun 2023 telah menemukan kita dengan pelbagai peristiwa dan pencapaian yang membanggakan negeri Selangor serta kehidupan penduduknya.

"Ini semestinya kejayaan bersama yang disumbangkan oleh semua. Syabas semua!" tulisnya di laman X pada 1 Januari.

Sebelum ini, Amirudin menganggarkan hasil yang boleh dikutip tahun lepas adalah RM2 bilion, dengan penyumbang utama premium tanah sebanyak RM753.72 juta bersamaan 38 peratus.

Perluas program selawat ke daerah

SHAH ALAM - Kerajaan Selangor berhasrat memperluas program Darul Ehsan Berselawat ke seluruh daerah tahun ini sebagai usaha menyuburkan jiwa umat Islam negeri ini.

Dato' Menteri Besar Dato' Seri Amirudin Shari berkata program keagamaan akan diisi acara alunan zikir, pengajian kitab warisan, turath selain selawat ke atas Nabi Muhammad SAW.

"Program ini bukan hanya jadi program bulanan dan tahunan, tetapi akan dilimpahkan di seluruh daerah. Kita

akan laksanakan setiap bulan dan setiap masa yang berkesempatan.

"Ini sebahagian usaha bagi dan menghidupkan hati manusia kerana kita bukan mahu membina bangunan agam, mewah serta kemudahan paling moden tetapi membangunkan jiwa manusia," katanya.

Beliau menghadiri program Darul Ehsan Berselawat 3.0 sempena sambutan ambang Tahun Baharu 2024 di Dataran Karnival, pekarangan Stadium Shah Alam di sini pada 31 Disember.

Beliau berkata rakyat menikmati pelbagai manfaat melalui program Iltizam Selangor Penyayang termasuk Jelajah Ehsan Rahmah yang menawarkan barang keperluan asas pada harga murah.

Mengambil contoh program Selangor Saring, Amirudin menambah inisiatif mulai Mei 2022 itu membantu ramai rakyat mengesan dan mencegah penyakit kritis sebelum keadaan semakin serius.

Beliau menjelaskan 2023 turut mencatat sejarah apabila rakyat memberi mandat kepada Kerajaan Perpaduan untuk meneruskan kerja baik dan usaha bagi tempoh lima tahun.

Edisi sulung Darul Ehsan Berselawat anjuran Pertubuhan Kebajikan dan Amal Wanita Selangor (Pekawanis) diadakan pada 14 Januari manakala siri kedua pada 29 Julai.

Program berkenaan bertujuan menyemai rasa cinta kepada Rasulullah SAW, memohon keberkatan Allah dan menghindar daripada perkara memudaratkan rakyat negeri ini.

Penganjuran itu selaras konsep Maysia Madani yang menyokong ke arah pembinaan sahsiah insan dan ketamadunan.

500 bersolidariti bersama Palestin

SHAH ALAM - Dato' Menteri Besar Dato' Seri Amirudin Shari bersama hampir 500 orang menyertai program Panggilan Intifada Doa Untuk Palestin sebagai solidariti kepada Palestin.

Acara di tapak karnival Stadium Shah Alam disertai beberapa artis antaranya Ella, Hijaz dan Kaka Azraf bersama Presiden Majlis Perundingan Pertubuhan Islam Malaysia (Mapim) Mohd Azmi Abdul Hamid.

"Ini sebahagian kaedah kita menaikkan semangat menjelang tahun baharu sesuai dengan keadaan semasa terutama yang menimpa sahabat saudara mara kita di Palestin.

"Semangat dan kecekalan mereka mempertahankan kedaulatan Palestin patut dicontoh dan dijadikan pedoman serta pengajaran," kata Amirudin pada 30 Disember.

Majlis agama untuk tahun baharu

SHAH ALAM - Alunan qasidah dan selawat bergema di Dataran Karnival, pekarangan Stadium Shah Alam di sini sempena program Darul Ehsan Berselawat 3.0 yang dihadiri lebih 10,000 orang.

Dato' Menteri Besar Dato' Seri Amirudin Shari dalam ucapannya berbangga dengan pertambahan pengunjung ke program keagamaan bagi memohon kebaikan negeri pada tahun mendatang termasuk keamanan saudara Islam di Palestin.

"Semoga dengan doa yang kita aminkan dan selawat yang kita lantunkan membawa kemakmuran serta kemajuan ke dalam negeri kita. Pada masa sama melatih kita menjadi insan berguna," katanya pada 31 Disember.

Kerja baiki benteng siap 8 Januari

SHAH ALAM - Kerja pemasangan cerucuk oleh Majlis Bandaraya Subang Jaya di kawasan tanah runtuhan di Taman Wawasan, Puchong dijangka selesai sepenuhnya pada 8 Januari.

Datuk bandar Subang Jaya berkata sebanyak 200 cerucuk dipasang untuk fasa kedua di sepanjang jajaran kiri dan kanan longkang kawasan tersebut.

"Fasa pertama merupakan proses pengukuran tanah di kawasan perumahan selesai pada 30 Disember lalu dengan memasang sebanyak 375 cerucuk di kawasan hadapan rumah dan bahagian hadapan longkang..

"Kini pemasangan cerucuk fasa kedua untuk proses pengalihan air sementara di kawasan longkang yang rosak dan runtuhan telah melebihi 50 peratus dengan memasang 200 cerucuk," kata Dato' Mohd Fauzi Mohd Yatim pada 3 Januari.

Semak cukai tanah dalam talian

SHAH ALAM - Bermula tahun ini, pentadbiran tanah negeri menetapkan tiada lagi pengeposan bil cukai tanah dan cukai petak kepada pemilik hartanah di Selangor.

Sebaliknya, Pejabat Tanah dan Galian (PTG) Selangor memaklumkan pemilik perlu mengimbas kod QR yang disertakan antaranya di media sosial bagi memperoleh bil dalam talian.

"Pengguna boleh mendaftar dengan memasukkan no akaun, ID atau butiran hak milik. Sebarang pertanyaan, sila berhubung dengan hasilptg@selangor.gov.my," katanya di Facebook pada 2 Januari.

Menerusi perkongsian poster pula agensi berkenaan turut mengingatkan pengguna membayar cukai berkaitan sebelum 31 Mei setiap tahun dengan merujuk ehasil.selangor.gov.my

Tanah atau petak dengan tunggakan cukai boleh dikenakan tindakan perampasan tanah bawah Seksyen 100 Kanun Tanah Negara 1965 dan Seksyen 23L Akta Hakmilik Strata 1985.

Sedia 1,800 lokasi beli barang asas

SHAH ALAM - Perbadanan Kemajuan Pertanian Selangor (PKPS) meneruskan program Jualan Ehsan Rahmah (JER) di lebih 1,800 lokasi seluruh negeri pada tahun ini.

Pengurus kanan pemasarannya berkata lokasi tersebut tidak termasuk program jualan murah barang asas di beberapa cawangan pasar raya Segi Fresh pada hujung minggu.

"Tahun ini kita sasar menjelajah lebih 1,800 lokasi. PKPS akan bekerjasama dengan Kementerian Perdagangan Dalam Negeri dan Kos Sara Hidup untuk anjur sekurang-kurangnya empat lokasi setiap hari."

"Bagi memastikan lebih ramai rakyat terima mafaat, kita akan libatkan lebih banyak cawangan pasar raya Segi Fresh untuk menjual produk PKPS dengan harga murah."

"Selain itu, wakil rakyat, penyelaras DUN atau ketua kampung juga boleh mohon anjur JER dalam talian. Kita akan maklumkan lebih lanjut proses permohonan ini," kata Md Fazir Abdul Latif pada 2 Januari.

Pada 22 September, EXCO Pertanian Ir Izham Hashim berkata Selangor membelanjakan subsidi RM40 juta untuk melaksanakan jualan murah yang memanfaatkan lebih lima juta rakyat.

Hulu Selangor, Gombak, Petaling, Shah Alam, Hulu Langat dan Sepang

	Imsak	Subuh	Syuru'	Zuhur	Asar	Maghrib	Isyak
04 Khamis	5:58	6:08	7:18	1:21	4:43	7:18	8:32
05 Jumaat	5:58	6:08	7:18	1:21	4:44	7:18	8:33
06 Sabtu	5:59	6:09	7:19	1:22	4:44	7:19	8:33
07 Ahad	5:59	6:09	7:19	1:22	4:44	7:19	8:34
08 Isnin	6:00	6:10	7:19	1:22	4:45	7:20	8:34
09 Selasa	6:00	6:10	7:20	1:23	4:45	7:20	8:34
10 Rabu	6:00	6:10	7:20	1:23	4:46	7:21	8:35

Klang dan Kuala Langat

Imsak	Subuh	Syuru'	Zuhur	Asar	Maghrib	Isyak
5:58	6:08	7:19	1:21	4:44	7:19	8:33
5:58	6:08	7:19	1:22	4:45	7:19	8:34
5:59	6:09	7:19	1:22	4:45	7:20	8:34
5:59	6:09	7:20	1:22	4:45	7:20	8:34
6:00	6:10	7:20	1:23	4:46	7:21	8:35
6:00	6:10	7:21	1:23	4:46	7:21	8:35
6:00	6:10	7:21	1:24	4:47	7:21	8:36

Sabak Bernam dan Kuala Selangor

Imsak	Subuh	Syuru'	Zuhur	Asar	Maghrib	Isyak
6:00	6:10	7:20	1:23	4:45	7:19	8:34
6:01	6:11	7:20	1:23	4:46	7:20	8:34
6:01	6:11	7:21	1:24	4:46	7:20	8:34
6:02	6:12	7:21	1:24	4:47	7:21	8:35
6:02	6:12	7:22	1:25	4:47	7:21	8:35
6:02	6:12	7:22	1:25	4:48	7:21	8:36
6:03	6:13	7:22	1:26	4:48	7:22	8:36

Kekal kesejahteraan pelbagai kaum

GOMBAK - Dato' Menteri Besar memberi jaminan kesejahteraan dan kebajikan rakyat berbilang kaum dan agama di negeri ini terus menjadi keutamaan pentadbirannya.

Dato' Seri Amirudin Shari berkata Kerajaan Negeri tidak memandang identiti kaum dan agama sebaliknya bersifat menyeluruh menerusi pelbagai bantuan termasuk peruntukan untuk rumah ibadat dan sekolah pelbagai aliran.

"Kita juga adalah negeri yang

menyediakan tapak rumah ibadat yang digazetkan bermakna rumah ibadat ini tidak perlu bayar premium sebagaimana yang berlaku suatu ketika dulu premiumnya sangat tinggi dan menyebabkan rumah ibadat tidak dapat didirikan.

"Kenapa buat begini? Sebab kita percaya kepada (prinsip) Rukun Negara iaitu Kepercayaan Kepada Tuhan dan menjadi salah satu tanggungjawab kerajaan pastikan rumah ibadah (termasuk) masjid, kuil, tokong

dan gereja dapat dipelihara dan dijaga.

"Kerajaan Negeri akan terus bekerja melaksanakan tanggungjawab memastikan kesejahteraan, keamanan dan kestabilan hidup semua rakyat yang tinggal di negeri ini," katanya pada 1 Januari.

Amirudin turut menyampaikan sumbangan hamper barang makanan kepada 15 pelajar cemerlang masyarakat India sekitar Selangor Baru.

PKPS nilai semua kuantiti produk

Jualan murah kembali 15 Januari

Oleh SITI ROHAIZAH ZAINAL

KLANG - Program Jualan Ehsan Rahmah (JER) kendalian Perbadanan Kemajuan Pertanian Selangor (PKPS) berehat seketika untuk kerja penyelenggaraan dan pengiraan semula kuantiti produk.

Pengurus kanan pemasarannya (Produk OEM & Eksport) berkata program dengan kerjasama Kementerian Perdagangan Dalam Negeri dan Kosara Hidup kembali beroperasi pada



15 Januari.

Md Fazir Abdul Latif berkata pihaknya mahu menambah baik kuantiti selain menambah produk termasuk beras import bagi memberi peluang kepada orang ramai untuk membelinya.

"Secara keseluruhan, jualan barang keperluan ini menjelajah ke 3,088 lokasi sejak September lalu hingga hari ini," katanya di Dewan Serbaguna Dato' Ahmad Razali pada 31 Disember.

Beliau juga memaklumkan PKPS kini memiliki produk daging lembu

sendiri bawah jenama Ehsan yang dibawa khas dari India.

"PKPS berjumpa sendiri dengan pengeluar bagi menjalankan pemeriksaan dan memastikan status halal terjamin.

"Lebih 1,500 karton dibawa sejak awal bulan ini dan mendapat sambutan pengunjung kerana produk berkualiti serta harganya murah," katanya.

JER menawarkan ayam RM10 se-ekor, daging pejal segar (RM10 per pek) dan telur gred B (RM10 sepahan), ikan kembung (RM6 setiap pek), minyak masak lima kilogram (RM25) dan beras lima kilogram.

PKNS pemaju rumah terbaik

SHAH ALAM - Perbadanan Kemajuan Negeri Selangor (PKNS) dinobat Pemaju Rumah Mampu Milik Terbaik (Asia) sempena Anugerah Hartanah PropertyGuru Asia 2023 di Bangkok, Thailand baru-baru ini.

Ketua Pegawai Eksekutifnya Dato' Mahmud Abbas berkata kejayaan itu satu lagi penanda aras yang mencerminkan kepakaran dan komitmen PKNS dalam menyediakan perumahan terbaik, berkualiti dan mampu dimiliki masyarakat khususnya di Selangor.

"Ia juga menandakan dedikasi dan usaha bersungguh-sungguh daripada seluruh pasukan PKNS yang terlibat dalam setiap fasa projek pembangunan perumahannya," katanya dalam kenyataan.

Beliau berkata pemenang di seluruh Asia bersaing mendapatkan markah kecemerlangan tertinggi dalam pembangunan, pembinaan, seni bina dan reka bentuk hartanah pada peringkat akhir majlis itu.



Lebih 50 anugerah disampaikan pada malam tersebut sebagai pengiktirafan kepada projek dan pemaju terbaik di rantau ini.

Pada 24 November, PKNS memenangi tiga anugerah dalam majlis PropertyGuru Asia Awards Malaysia with iProperty 2023 iaitu Pemaju Rumah Mampu Milik Terbaik (Malaysia), Pengiktirafan Khas dalam Reka Bentuk dan Pembinaan Lestari serta Anugerah Pilihan Rakyat.



PULIHARA... Kakitangan Lembaga Urus Air Selangor bersama penduduk Sungai Air Keroh, Sepang menanam pokok buluh di pintu air sungai tersebut bagi memupuk kesedaran mengenai kepentingan menjaga sumber air dalam program Friends of Rivers Negeri Selangor pada cuti umum 1 Januari. Foto Facebook Friends of Rivers for Selangor

Elak penularan jangkitan

Terus amal langkah cegah Covid-19

Oleh SOFIA NASIR

SHAH ALAM - Kerajaan Negeri menasihati orang ramai supaya mengamal TRIIS (uji, lapor, asing, maklum, dapat rawatan) bagi mengebak penularan jangkitan Covid-19.

EXCO Kesihatan Awam Jamaliah Jamaluddin berkata amalan tersebut perlu dibuat selain kawalan kendiri khususnya ketika berada di kawasan awam.

"Kes Covid-19 dijangka meningkat



berikutan musim perayaan dan cuti sekolah. Jadi kita mesti sentiasa ambil langkah berjaga-jaga dan elakkan daripada berkumpul di tempat orang ramai.

"Jaga diri dan pakai pelitup muka dan guna pembasmi kuman. Dapatkan rawatan jika bergejala terutama jika ia semakin serius," katanya dalam rakaman di Facebook pada 29 Disember.

Jamaliah turut menasihati golongan berisiko tinggi atau individu yang kerap berinteraksi dengan orang ramai supaya mendapatkan vaksin se-

bagai langkah perlindungan.

"Sekiranya anda tergolong dalam individu berisiko tinggi, dapatkan vaksin sebagai dos primer atau dos penggalak yang boleh mengurangkan risiko kematian," katanya.

Sebelum ini, menteri kesihatan memaklumkan kes Covid-19 bagi minggu epidemiologi ke-51 iaitu bagi tempoh 17 hingga 22 Disember meningkat sebanyak 29.5 peratus.

Datuk Seri Dr Dzulkefly Ahmad berkata ia membabitkan jumlah sebanyak 22,413 kes berbanding 17,307 kes yang direkodkan pada minggu sebelumnya.

Peluang sertai akademi kepimpinan

SHAH ALAM - Akademi Kepimpinan Wanita (AKW) membuka permohonan kemasukan pelajar kohort 4 Sesi 2024/2025 bagi kemasukan April depan.

Ketua Pegawai Eksekutif Wanita Berdaya Selangor (WBS) Rozeeta@Hidayah Ramli berkata pihaknya menerima 71 permohonan setakat ini dan tarikh akhir memohon sehingga 20 Januari.

"AKW kohort 4 bermula sekitar April 2024 bagi tempoh pembelajaran selama 12 bulan terbuka kepada wanita Malaysia berumur 21 hingga

45 tahun yang lahir atau bermastautin lebih tiga tahun di Selangor.

"Selain itu, (pemohon) berminat dengan kerja kemasyarakatan dan ingin menggilap bakat kepimpinan, pengurusan organisasi, insaniah dan kemahiran politik," katanya pada 3 Januari.

Mereka yang berminat boleh layari laman sesawang www.wbselangor.com.my/akademikepimpinanwanita/ untuk maklumat lanjut.

AKW merupakan program tajaan Kerajaan Negeri bagi memantapkan ke-

mahiran wanita dan bertindak sebagai 'saluran bakat' ke arah melahirkan lebih ramai pemimpin wanita di lapanan politik serta kerja sosial.

Empat modul utama pembelajaran ialah kemahiran insaniah dan organisasi, kefahaman gender, kepimpinan politik dan ekonomi serta kemahiran komunikasi.

Kelas pada setiap Rabu selepas waktu bekerja bermula 6 petang hingga 9 malam di Perbadanan Perpustakaan Awam Selangor berjaya melahirkan 248 graduan.

Ubah laluan bas di Hulu Selangor

SHAH ALAM - Empat laluan Bas Smart Selangor dipinda di sekitar kawasan pentadbiran Majlis Perbandaran Hulu Selangor (MPHS), berkuat kuasa 1 Januari.

Menerusi Facebook pihak berkusa tempatan itu, laluan berkenaan ialah HS01 (Kuala Kubu Bharu-Rasa-Bukit Sentosa) dan HS02 (Antara Gapi-Batang Kali-Antara Gapi).

Turut terlibat ialah laluan HS03 (Bukit Sentosa-Sungai Buaya-Bukit Sentosa) dan HS04 (Bukit Sentosa-Taman Bunga Raya-Bukit Sentosa).

"Pindaan ini selaras trend perkhidmatan Bas Smart Selangor yang mendapat permintaan tinggi dan tahap kemudahsampaian yang baik di kawasan liputan khususnya Hulu Selangor," katanya.

Kedudukan rendah punca bah

SHAH ALAM - Kedudukan Kampung Batu 7, Ijok yang berada di kawasan rendah merupakan faktor utama kejadian banjir termenung kerap berlaku.

Jurutera Jabatan Pengaliran dan Saliran Kuala Selangor Syaiful Mizan Zamiyan berkata aliran air dari penempatan berhampiran ke kampung berkenaan turut menyumbang kepada pengumpulan air.

"Apabila berlaku hujan lebat di bahagian hulu lembangan Sungai Buloh (dalam daerah Petaling dan Gombak), aras sungai di Kampung Batu 7 akan tinggi melebihi paras parit.

"Pintu air perlu ditutup bagi mengelak air sungai masuk kampung. Keadaan aras air sungai tinggi akan berlarutan sehingga tiga hari. Sekiranya hujan berulang di hulu sungai, tempoh pintu air ditutup akan lebih lama," katanya seperti dilapor Harian Metro.

RM10,000 hadiah pertandingan digital

SHAH ALAM - Pengurusan Air Selangor Sdn Bhd (Air Selangor) menganjurkan Hackathon Data dan Digital 2024 dalam usaha menyumbang kepada kemajuan pendigitalan industri perkhidmatan air.

Terbuka kepada individu, profesional dan pelajar universiti, pertandingan menawarkan wang tunai RM10,000 untuk tempat pertama diikuti RM5,000 (kedua) serta RM3,000 (ketiga).

"Hackathon Data dan Digital Air Selangor 2024 akan menjadi platform bagi peminat teknologi untuk berkongsi pandangan dan menyelesaikan set data raya yang kompleks dengan menggunakan aplikasi sains data."

Turut terbuka kepada kakitangan, Air Selangor menawarkan wang tunai RM2,000 kepada pemenang. Maklumat lanjut atau pendaftaran layari digital.airselangor.com/hackathon

Kenderaan ringan dibenar naik

SHAH ALAM - Kenderaan ringan seperti van, kereta dan motosikal dibenarkan masuk ke Bukit Malawati, Kuala Selangor untuk lawatan pada hari bekerja mulai 2 Januari.

Arahan terbaharu Majlis Perbandaran Kuala Selangor (MPKS) berikutnya perkhidmatan trem sedia ada hanya beroperasi pada hujung minggu dan cuti umum dari 9 pagi hingga 6 petang.

"Kebenaran ini tertakluk kepada perubahan dan bergantung kepada keperluan semasa," maklum pihak berkuasa tempatan itu di Facebook baru-baru ini.

Menurut MPKS, trem juga akan beroperasi pada Isnin hingga Jumaat sepanjang cuti persekolahan bermula 9 pagi hingga 4 petang untuk kegunaan orang ramai.

Bukit Malawati menyimpan pelbagai kesan sejarah Selangor seperti makam sultan, batu hampar, pusara Panglima Hitam dan busut Malawati.

Peluang lanjut pengajian di Unisel

SHAH ALAM - Universiti Selangor (Unisel) membuka permohonan kemasukan pelajar baharu bagi kemasukan April.

Universiti milik Kerajaan Negeri itu menawarkan program pengajian peringkat program asas, diploma, sarjana muda, sarjana dan ijazah doktor falsafah (PhD).

Permohonan dalam talian boleh dibuat menerusi pautan etawaran.unisel.edu.my/ dan semakan program ditawarkan di www.unisel.edu.my/admission/programmes-offered/

Maklumat lanjut hubungi 03-5522 3400 atau Whatsapp 018-378 8756 (Cik Noor Suraya), 018-372 8049 (Cik Rehan), 018-356 6703 (Encik Fadly) dan 018-381 6472 (Cik Bunga).

Bayar parkir digital di Batang Kali, KKB

SHAH ALAM - Sistem bayaran parkir pintar fasa dua membabitkan Batang Kali dan Kuala Kubu Baharu (KKB) bermula 1 Januari.

Majlis Perbandaran Hulu Selangor (MPHS) memaklumkan pengguna perlu membayar caj menerusi aplikasi Smart Selangor Parking (SSP) dan Flexi Parking.

Sebelum ini, fasa satu sistem berkenaan dimulakan membabitkan kawasan Bukit Beruntung dan Bukit Sentosa sejak 1 Disember.

Caj bermula jam 8 pagi hingga 6 petang (Isnin hingga Jumaat) ialah RM0.50 sen sejam dan RM50 untuk sebulan. Manakala Sabtu, Ahad dan hari kelepasan am adalah percuma.

Sebarang pertanyaan lanjut, sila hubungi hotline 1-700-819-612 / 03-6064 1331 sambungan 135.

Taman tema air jadi tumpuan ramai

SHAH ALAM - Taman tema air Splash-Mania di Gamuda Cove, Kuala Langat yang dibuka awal tahun ini antara lokasi tumpuan pelancong tempatan dan antarabangsa, kata Tourism Selangor.

Pengurus komunikasi korporatnya menjelaskan taman tema itu menerima 75,000 pelawat setiap bulan sekali gus pilihan ramai ketika hujung minggu dan cuti persekolahan.

Menurut Ahmad Nazri Tashriq Rahmat, lokasi lain yang popular termasuk

pekan Kuala Kubu Baharu (Hulu Selangor) Sungai Panjang dan Sekinchan (Sabak Bernam) serta Bukit Malawati di Kuala Selangor.

"Kunjungan ramai ke lokasi tersebut berikutan trend pelancongan di Selangor yang terdiri daripada tarikan gastronomi, ekopelancongan, sukan lasak dan taman tema."

"Kebanyakan pusat pelancongan juga turut menyediakan kemudahan lengkap termasuk pengangkutan awam seperti transit aliran ringan

(LRT) dan Bas Smart Selangor," katanya pada 27 Disember.

Beliau menjangka kempen promosi pelancongan tempatan dan antarabangsa yang giat dijalankan Tourism Selangor akan terus menarik kehadiran pengunjung.

Pada 20 Disember, EXCO Pelancongan Dato' Ng Suee Lim berkata kempen pelancongan global "Splendid Selangor, Take Me Anywhere!" diteruskan ke beberapa negara bagi menarik pelancong asing ke negeri ini.

Negeri rangka ekonomi penjagaan

Usaha tingkat kesejahteraan

SHAH ALAM - Selangor menggariskan lima elemen penting dalam mewujudkan dasar berkaitan sektor ekonomi penjagaan melibatkan kanak-kanak, wanita dan warga emas yang bakal diluncurkan pada suku kedua 2024.

EXCO Pembangunan Wanita dan Kebajikan Masyarakat Anfaal Saari berkata elemen berkenaan adalah advokasi dan promosi, tatakelola dan kawal selia, tenaga kerja dan penjaga terlatih, pelaburan dan kerjasama serta inovasi dan teknologi.

"Advokasi dan promosi untuk mengejutkan pasti kepentingan, keadaan



semasa ekonomi penjagaan, sekiranya kita boleh selaraskan (inisiatif), maka di situ ada peluang ekonomi. Tersa se kedua tentang tatakelola dan kawal selia, kerajaan negeri berhasrat untuk memenuhi keperluan ibu bapa seperti taska.

"Ketiga, tenaga kerja dan penjaga terlatih (iaitu) memastikan tenaga kerja dan penjaga terlatih mendapatkan latihan yang berstruktur, keempat (pelaburan dan kerjasama) iaitu kerajaan memainkan peranan untuk memberi rangsangan kepada syarikat contohnya dalam pengumpulan data," katanya seperti dilapor Bernama pada 29 Disember.

Beliau berkata teras kelima menuju penggunaan teknologi yang mengambil kira cara masyarakat dapat meningkatkan kecekapan dan memberikan akses kepada kumpulan sasar.

Sektor penjagaan ditakrif sebagai aktiviti dan hubungan yang terlibat dalam memenuhi keperluan fizikal, psikologi dan emosi orang dewasa dan kanak-kanak, tua dan muda, lemah dan yang sihat.

Anfaal menjelaskan kerangka tersebut menyelesaikan pelbagai masalah berbangkit bagi golongan wanita dalam sektor kerja penjagaan kerana ia dilihat menerusi hubungannya dengan pasaran, upah, ciri kerja yang dilakukan dan sasaran penerima.

RM1.2 juta tingkat kemudahan

SHAH ALAM - Lembaga Zakat Selangor (LZS) menyalur RM1.2 juta bagi menampung kos baik pulih seluruh institusi agama di Hulu Langat sepanjang tahun lalu.

Agensi itu memaklumkan, sumbangan berkenaan sebahagian bentuk agihan bantuan daripada sumber zakat orang ramai.

"Masjid Teras Jernang di Bandar Baru Bangi menerima RM65,000 manakala Masjid Baitul Rahman di Taman Alam Sari sebanyak RM75,000.

"Selain itu, sepanjang 2023 sebanyak RM1.2 juta telah diagihkan kepada institusi agama seluruh daerah Hulu Langat untuk pelbagai tujuan termasuklah pe-

masangan karpet, baik pulih surau dan masjid selain sekolah," maklumnya di Facebook.

Majlis penyerahan disampaikan Ketua Pegawai Operasi LZS Ahmad Fadhil Hassan dan Timbalan Ketua Divisyen Operasi Agihan Asnaf LZS Md Yusmizan Yusuf baru-baru ini.

Baik pulih jalan siap 77 peratus

SHAH ALAM - Kerja baik pulih permukaan jalan di Sabak Bernam siap 77 peratus setakat 29 Disember, maklum Infrasel Sdn Bhd (Infrasel).

Syarikat penyelenggara jalan negeri memaklumkan kerja baik pulih laluan B55 Jalan Sungai Air Tawar dilaksanakan sejak 22 Disember.

"Infrasel giat melaksanakan kerja membaik pulih permukaan laluan B55 Jalan Sungai Air Tawar, Seksyen 2.50 -

3.30 dan 3.80 – 4.50 di Sabak Bernam," katanya di Facebook.

Pada 22 Ogos, Eksekutif Operasi Infrasel Abdullah Hanif Abd Ghalib memaklumkan pelaksanaan 93 projek baik pulih besar-besaran di seluruh negeri mencapai 86 peratus.

Katanya, pembaikan menerusi Projek Turapan Mega dengan kos RM50 juta memberi keutamaan jalan yang perlu dibaiki berdasarkan aduan orang awam.

Pada 9 Julai, EXCO Infrastruktur Ir Izham Hashim memaklumkan projek turapan melibatkan 118 jalan merangkumi jalan pihak berkuasa tempatan, Jabatan Kerja Raya, Jabatan Pengairan dan Saliran serta pejabat daerah dan tanah (PDT).

Jalan terlibat meliputi 66 di Petaling diikuti Klang (39), Gombak (29), Hulu Langat (27), Sepang (19), Sabak Bernam (17), Kuala Langat (16), Kuala Selangor (11) dan Hulu Selangor (8).



Masdiana mengunjungi wad bersalin sempena program sambutan bayi tahun baru 2024 di Hospital Tengku Ampuan Rahimah, Klang pada 1 Januari. Foto FIKRI YUSOF

Tumpu ibu dan kanak-kanak

Teruskan program lawat pesakit

Oleh SITI ROHAIZAH ZAINAL

KLANG - Pertubuhan Kebajikan dan Amal Wanita Selangor (Pekawanis) meneruskan Program Ziarah Medik dengan mengunjungi pesakit di hospital di setiap daerah bermula tahun ini.

Yang Dipertua Datin Seri Masdiana Muhamad berkata program sebelum ini menjelajah ke setiap Dewan Undangan Negeri (DUN) untuk melawat pesakit kronik di rumah.

"Sebelum pandemik Covid-19, kita mengadakan lawatan ke hospital, tetapi susulan penularan wabak kita hentikan seketika kerana khawatir menjadi pembawa selain terikat dengan polisi hospital."

"Kini kita kembalikan semula ziarah ke hospital memandangkan ada keperluan untuk turun berbanding melawat ke rumah. Lawatan juga diadakan di wad-wad tertentu tetapi memfokuskan kepada ibu dan kanak-kanak," katanya.

Beliau menghadiri program sambutan kelahiran bayi tahun baru 2024 di Hospital Tengku Ampuan Rahimah di sini dan diiringi Pengaruhnya Dr Zukarnain Mohd Rawi pada 1 Januari.

Program Ziarah Medik yang mema-

suki tahun ketiga itu mengutamakan ibu tunggal dan orang kurang upaya (OKU) daripada keluarga kurang berkelebihan (B40).

Beliau turut memaklumkan antara program lain ialah Darul Ehsan Berselawat yang memulakan siri jelajahnya pada Februari di Sabak Bernam.

Sebanyak RM200,000 diperuntuk untuk program merangkumi dua fasa, yang setiap pesakit menerima bantuan RM250 seorang.

Pekawanis turut meraikan ibu dan bayi tahun baharu di Hospital Tengku Ampuan Rahimah (HTAR) di sini.

Masdiana berkata aktiviti itu adalah program tahunan untuk berkongsi kegembiraan kelahiran sambil menekankan peranan penting sistem sokongan kepada ibu dan bayi.

"Setakat 10 pagi, enam bayi tahun baharu lahir di HTAR dan kami bertanya khabar keadaan ibu dan bayi.

"Saya juga bertanya kepada pengurusan hospital berhubung keperluan yang boleh dibantu atau dicadangkan kepada pihak tertentu," katanya.

Masdiana berkata pelbagai bantuan disediakan Kerajaan Negeri bermula bayi hingga warga emas dalam memastikan kesejahteraan masyarakat terus dipertingkatkan.

Kunjungi pameran Anak-Anak Sidek

SHAH ALAM - Ibu bapa diseru membawa anak ke Pameran Anak-anak Sidek yang berlangsung sehingga 30 April di Muzium Sultan Alam Shah di sini.

EXCO Kebudayaan dan Warisan Borhan Aman Shah berkata hampir 5,000 individu sudah mengunjungi pameran itu yang bermula 1 November.

"Kita mengalu-alukan orang ramai sama ada dalam mahupun luar Selangor datang ke pameran ini bagi melihat sendiri sejarah, pingat dan medal diterima anak-anak Sidek dalam arena badminton negara.

"Pameran ini juga diadakan bagi memberi semangat kepada legasi anak muda supaya boleh memberi inspirasi untuk menjadi pemain badminton berjaya kelepas," katanya dalam rancangan Selamat Pagi Malaysia RTM pada 2 Januari.

Borhan berkata ia tercusus selepas Kerajaan Negeri menganjurkan Pameran Legenda Bola Sepak Negara Dato' Mokhtar Dahari sebelum ini.

Misbun (Bun), Razif (Ajib), Jailani (Alan), Rahman (Aman) dan Abdul Rashid (Adul) adalah Lima Sidek bersaudara yang melaikar sejarah penting buat Malaysia dalam sukan badminton dunia.

Taman Bestari

Jenjarom

Rumah Teres 2 Tingkat

Hakmilik Kekal

**Hanya Tinggal
14 unit
Lot Bumiputera !!
7% Rebate
untuk Bumiputera**

Procedure Development By : **CHIN NAM CITY DEVELOPMENT SDN BHD**

CHIN NAM CITY DEVELOPMENT SDN. BHD.
(Co. No.1176877-P)

NO.16-D, Jalan Suarasa 8/4,
Bandar Tun Hussein Onn,
43200 Cheras, Selangor Darul Ehsan.
Tel : 03-9081 7731

No. lesen Pemaju: 30194/09-2027/0193(A) Tempoh Sah: 14/9/23-13/9/27 No. Permit Iklan & Jualan: 30194-1/12-2024-0088(A)-L Tempoh Sah: 06/12/2022 sehingga 05/12/2024 Nama Pemaju: CHIN NAM CITY DEVELOPMENT SDN. BHD. Tel: 03-9081 7731 Pegangan Tanah: Pegangan Kekal Tarikh Dijangka Siap: 4/2024 Harga Jualan (Min.): MYR628,000.00 Harga Jualan (Mak.): MYR1,050,000.00 Bilangan Unit: 27 Baki Unit Yang Belum Dijual iaitu 14 Unit Pihak Berkurusan yang meluluskan: Majlis Perbandaran Kuala Langat No. Rujukan: MPKL/JKB/1/4/6/2021(A)/13

Daging, ikan laris kurang sejam

GOMBAK - Ikan dan daging antara produk yang habis terjual dalam tempoh kurang sejam dalam Jualan Ehsan Rahmah (JER) peringkat Dewan Undangan Negeri Sungai Tua.

Penyelarasnya Mohamad Nazif Zulkifli berkata ratusan pengunjung beratur sejak 7 pagi bagi mendapatkan aneka barang asas murah di padang awam Batu Caves di sini.

"200 pek daging dan 200 pek ikan habis terjual kurang sejam sejak kaunter jualan dibuka pada jam 9.30 pagi. Kita mula agihkan 300 nombor mulai 9 pagi.

"Kami tetapkan had untuk satu papan telur, seekor ayam dan sekampit beras bagi setiap pembeli selepas pukul 11 pagi untuk beri ruang kepada semua pengunjung dapatkan keperluan mereka selain elakkan kesesakan," katanya pada 27 Disember.

4,000 penduduk terima manfaat JER

GOMBAK - Hampir 4,000 penduduk menerima manfaat daripada 10 kali pengjuran Jualan Ehsan Rahmah (JER) di Dewan Undangan Negeri (DUN) Sungai Tua sejak Ogos.

Pegawai Pusat Khidmat Rakyat Shamugam Batumalay berkata jualan murah kendalian Perbadanan Kemajuan Pertanian Selangor (PKPS) kerap diadakan susulan permintaan tinggi penduduk.

"Setiap program jualan murah yang diadakan di DUN Sungai Tua akan menerima kehadiran pengunjung antara 350 hingga 400.

"Kira-kira 4,000 keluarga berpendapatan rendah menerima manfaat daripada 10 pengjuran JER di kawasan ini sejak Ogos lalu," katanya pada 27 Disember.

Skim pembiayaan kembang niaga

SHAH ALAM - Yayasan Hijrah Selangor (HIJRAH) menawarkan pelbagai skim pembiayaan bagi membantu usahawan untuk memula dan mengembangkan perniagaan.

Antara pembiayaan yang ditawarkan termasuklah skim i-Bisnes, Zero To Hero, Niaga Darul Ehsan (NADI), Go Digital, i-Bermusim dan Pembangunan Usahawan India Selangor (SITHAM).

Menurut agensi itu di Facebook, pemohon boleh muat turun maklumat pembiayaan menerusi www.hijrahselangor.com/risalah-skim-hijrah.../ atau pautan mikrokredit.selangor.gov.my/

Pemohon juga boleh menghubungi cawangan HIJRAH berhampiran untuk mendapat maklumat lanjut berkaitan pembiayaan.

Sejak 2010, HIJRAH menyalur RM775 juta modal tambahan yang memberi manfaat kepada 58,000 usahawan kecil dan sederhana memulakan serta meluaskan perniagaan.

Guna media sosial tarik pengunjung

SEPANG - Inisiatif Perbadanan Kemajuan Pertanian Selangor (PKPS) membuat hebatan lokasi Jualan Ehsan Rahmah (JER) dalam media sosial bagi memudahkan pembeli mendapatkan maklumat terkini.

Jurujual Syafriza Yusmisi, 21 berkata inisiatif itu membantu beliau mendapatkan maklumat lokasi terdekat bagi mendapatkan barang keperluan.

"Saya ikuti Facebook PKPS.

Keluarga saya ramai jadi boleh berjimat bila membeli di sini," katanya dalam program peringkat Dewan Undangan Negeri Dengkil pada 31 Disember.

Kakitangan kerajaan Muhammad Azhelry Yusuf, 41, berkata mutu bar-

ngan mendorongnya tidak lagi membeli barang mentah seperti daging, ayam, telur dan ikan di tempat lain atau pa-sar raya.

"Saya memang tunggu program JER dan ikuti jadual di Facebook untuk beli barang di sini kerana kualitinya sama malah kadang kala lebih baik dari pasar raya, harga lebih murah.

"Dengan keadaan ekonomi tidak menentu sekarang program ini meringankan beban rakyat, saya harap ia diteruskan," katanya.

Orang ramai boleh menyemak lokasi lengkap jualan murah setiap hari (kecuali Jumaat dan cuti umum) di Facebook PKPS atau pautan linktr.ee/myPKPS

Sementara itu, barang kering jen-

ma Ehsan keluaran PKPS terus menjadi pilihan pengguna sepanjang program berkepanaan.

Pekerja Amnya Muhammad Syahmi Asymawi berkata barang seperti tepung gandum, bihun, sos tomato, sos tiram, kaya pandan dan cili giling semakin dikenali dan mendapat sambutan.

"Boleh dikatakan setiap kali program JER orang ramai bertanya mengenai produk kering keluaran Ehsan terutam sardin dalam tin kerana mereka puas hati dengan kualitinya.

"Ini membuktikan platform JER berhasil mempromosi produk kering keluaran Ehsan PKPS sekali gus memanfaatkan rakyat yang memerlukan," katanya.

Suri rumah akui Jimat Belanja

Kunjung jualan murah lebih 30 kali

Oleh FITRI HAZIM HAZAM

GOMBAK - Harga murah menjadikan Jualan Ehsan Rahmah (JER) pilihan ramai mendapatkan barang asas sehingga ada yang mengunjunginya lebih 30 kali.

Suri rumah Evayulia Jamaludin, 56, mengakui mengunjungi program itu sejak tahun lalu kerana harga ditawar menjimatkan perbelanjaan dapur berbanding tempat lain.

"Setiap kali apabila program JER diadakan di bawah parlimen Gombak saya pasti akan hadir bersama suami mendapatkan barang asas kerana haranya murah.



"Saya harap bukan sahaja diteruskan, malah lebih kerap diadakan kerana ia memberi manfaat meringankan golongan berpendapatan rendah," katanya di Batu Caves di sini pada 27 Disember.

Bagi Teh Bee Yeow, 52, jualan murah itu menjimatkan sehingga 50 peratus perbelanjaan barang asas rumahnya dalam tempoh seminggu.

"Bekalan mencukupi tetapi perlu hadir awal selain berkualiti. Saya dapat menampung keperluan untuk enam orang isi rumah banding beli di luar," katanya.

Pekerja swasta, Keerthana Ram, 29, pula berkata JER menjimatkan perbe-

lanjaan dapurnya sehingga 30 peratus.

"Ini kali kedua saya datang program ini bagus kerana bekalan mencukupi dan murah menjadikan pilihan saya untuk berbelanja barang dapur," katanya.

JER yang dahulunya dikenali sebagai Jelajah Ehsan Rakyat menawarkan ayam RM10 seekor, daging pejal segar (RM10 per pek), telur gred B (RM10 sepapan), ikan kembung (RM6 setiap pek), minyak masak lima kg (RM25) dan beras lima kg (RM13).

Orang ramai boleh menyemak lokasi lengkap jualan murah setiap hari (kecuali Jumaat dan cuti umum) di Facebook PKPS atau pautan linktr.ee/myPKPS

Pasar baharu berkonsep mesra alam

SHAH ALAM - Pembinaan pasar pagi baharu di Jalan Besar, Seri Kembangan yang bermula pertengahan tahun ini mengetengah konsep moden, bertenologi hijau dan mesra alam.

Ahli Dewan Negeri Seri Kembangan Wong Siew Ki berkata antara konsep yang dikemukakan termasuk penggunaan panel solar, sistem penuaian air hujan dan mesin kompos.

"Saya akan cuba bawa cadangan ini kepada Kerajaan Negeri supaya konsep pasar itu boleh jadi contoh untuk pembinaan lebih banyak lagi pasar yang

mesra alam di negara ini.

"Selain itu ia juga dicadangkan supaya lebih mesra orang kurang upaya dan warga emas," katanya pada 2 Januari.

Siew Ki menambah Majlis Bandaraya Subang Jaya (MBSJ) dijangka mengajurkan pertandingan bagi mereka bentuk bangunan pasar terbabit.

"Saya difahamkan MBSJ sudah berhubung dengan persatuan arkitek dan dijangka akan adakan pertandingan reka bentuk pasar itu."

"Kita benar-benar berharap konsep

hijau ini dapat direalisasikan di pasar ini dan pembinaannya berjalan mengikut jadual," katanya.

Sebelum ini, Siew Ki memaklumkan pembinaan pasar baharu itu dijangka bermula pertengahan tahun ini dengan anggaran kos RM6 juta yang diperuntuk Kerajaan Negeri.

Dijangka siap dua hingga tiga tahun lagi, ia bakal memuatkan 400 peniaga. Ketika ini peniaga sedia ada ditempatkan di lokasi transit bagi memastikan kelancaran perniagaan masing-masing.



Asal mula
jujukan DNA
manusia

14



Rezeki
madu
kelulut

15

Mutu kelas percuma

Oleh ABDUL RAHIM SABRI
Foto FIKRI YUSOF

Kerajaan Negeri melaksana pelbagai program pendidikan untuk anak muda, khususnya berpendapatan rendah supaya cemerlang dalam pelajaran.

Antaranya Program Tuisyen Rakyat Selangor (PTRS), yang keberkesanannya terbukti apabila 215 calon Sijil Pelajaran Malaysia (SPM) mencatat keputusan 8A hingga 11A pada 2022.

Melibatkan calon SPM di 60 sekolah seluruh Selangor dalam PTRS, keputusan 8A diraih 81 pelajar, 9A (68 pelajar), 10A (38 pelajar) sementara 28 calon mendapat 11A.

Diperkenal sejak 2009 dengan nama tuisyen rakyat, 215 calon cemerlang itu antara 10,000 pelajar peserta program berkenaan dari 277 sekolah menengah bawah Kementerian Pelajaran dan Jabatan Agama Islam Selangor (Jais) sejak 2021.

Program itu mengasah pelajar kurang berkemampuan supaya tidak gagal peperiksaan penting, termasuk Ujian Pencapaian Sekolah Rendah (UPSR), sebelum dimansuh pada April 2021.

“Kita tak mahu dia (pelajar) gagal. Sekurang-kurangnya habis SPM dia ada sijil,” kata Ketua Tanggungjawab Sosial dan Komunikasi Korporat Menteri Besar Selangor (Pemerbadanan) atau MBI Ahmad Azri Zainal Nor.

“Memang kita utamakan (pelajar) yang berada atas pagar (antara lulus atau gagal),” katanya pada 31 Oktober.

Susulan peningkatan bilangan pelajar kerana penyertaan sekolah seliaan Jais, maka syarat diubah pada 2023 dan pelajar daripada keluarga berpendapatan RM5,000 ke bawah sebulan, boleh mengikuti PTRS.

Dari 215 orang, 65 pelajar Sekolah Agama Malaysia (SAM) Bestari Subang Jaya cemerlang, merangkumi 11 pelajar mendapat 8A. Sementara lapan memperoleh 9A, 25 pelajar (10A) dan 21 pelajar (11A).

Mengikut daerah Jabatan Pendidikan Negeri, Petaling Perdana merekod pencapaian pelajar teramai mendapat 8A dan ke atas iaitu 124 orang, diikuti



Klang dengan 42 orang dan Hulu Selangor 16 orang.

Mereka antara 65,000 calon Sijil Pelajaran Malaysia (SPM) seluruh Selangor menerima enam buku rujukan PTRS yang kandungannya berkualiti.

“Jika tanya mana-mana orang yang berkait pendidikan, buku-buku rujukan kita ini, ada prestij dia. Maknanya orang mesti cari.

“Dulu ada pelajar tak dapat, tak semua pelajar dapat (buku rujukan), (sebab) dulu ada had, 10,000 orang pelajar sahaja, (tapi) mereka sanggup cetak buku tu,” katanya.

Elaun guru

Menerusi dana MBI sebanyak RM7 juta pada 2023, PTRS mengadakan 1,662 tuisyen meliputi enam subjek SPM – bahasa Melayu, Inggeris, Sejarah, Matematik, Sains dan Matematik Tambahan.

Secara tidak langsung, seramai 1,662 guru juga dipilih mengajar empat jam dalam sebulan atau maksimum 12 jam bagi tempoh tiga bulan untuk satu subjek. Waktu dan tempoh pembelajaran ditentukan pendidik itu sendiri.

Elaun turut disalur kepada 1,956 guru, penyelaras sekolah, kakitangan Pejabat Pendidikan

Daerah (PPD) dan pasukan khas PTRS. Dana itu juga diguna untuk makan tengahari dan buku rujukan untuk menjayakan PTRS.

Modul pelajaran disusun panel guru penggubal Jabatan Pendidikan Negeri. Naskhah itu turut menjadi buruan pelajar tidak terpilih menyertai tuisyen berkenaan yang terhad 10,000 orang.

“Kita letak ‘softcopy’ (salinan perisian) dekat (portal) E-PTRS, mereka sanggup cetak daripada situ. Kita tak kenakan hak cipta. (Boleh) cetaklah,” kata Ahmad Azri.

Menurutnya, portal E-PTRS dijenamakan semula daripada Selangor Tutor. Ia mengandungi rakaman video pembelajaran bagi mata pelajaran berkaitan sewaktu perintah kawalan pergerakan.

Azri memaklumkan keputusan menambah sehingga 200,000 pelajar secara berperingkat bermula 2024.

Ia melibatkan pelajar tingkatan empat sebagai persediaan awal menduduki SPM tahun berikutnya, selain menyasarkan murid yang tercicir akibat penutupan sekolah rendah dek Covid-19 pada 2020.

Tindakan itu bagi menunaikan manifesto Pakatan Harapan-Barisan Nasional pada pilihan raya negeri Selangor 2023. Kejayaan PTRS juga mendorong peruntukan tambahan

KEPUTUSAN SPM 2022 PELAJAR PTRS

KEPUTUSAN	JUMLAH PELAJAR
11A	28 orang
10A	38 orang
9A	68 orang
8A	81 orang
JUMLAH	215 orang

Sumber Menteri Besar Selangor (Pemerbadanan)

RM3 juta melalui Belanjawan Selangor 2024.

Mengimbau pencapaian PTRS sesi 2021/2022, Ahmad Azri mendedahkan program itu berjaya menarik 48,059 orang kerap melayari video pengajian di portal E-PTRS.

Sebagaimanya 6,948 murid Selangor berdaftar termasuk 3,157 peserta PTRS yang menduduki SPM pada tahun berkenaan.

Pelajar berpotensi cemerlang akan dipilih menyertai program pecutan akhir menjelang SPM, yang diberi tips menjawab soalan dalam seminar anjuran PPD dan panel penasihat PTRS.

Buku buruan ramai

Oleh NADIAH ZAMLUIS

Usaha Kerajaan Negeri menjayakan projek terjemahan judul penting dunia dan menganjurkan pesta buku saban tahun diiktiraf apabila Dato' Menteri Besar menerima Anugerah Buku Negara 2023.

Menjulang piala Anugerah Perdana: Tokoh Kepimpinan Muda Cemerlang Dalam Memartabatkan Pembangunan Buku Negara, Dato' Seri Amirudin Shari menyifatkan penghargaan itu untuk Selangor seluruhnya.

“(Anugerah) ini bukan kemenangan peribadi tetapi pengiktirafan buat Selangor yang mempunyai projek pencerahan rakyat menerusi terjemahan karya agung, diskusi dan pesta buku yang memberi dampak baik kepada pembaca dan penerbit.

“Malah, penggal (ke-15) ini kita mula memberi baucar buku di universiti dalam Selangor dan Lembah Klang yang akan dilebar serta diperhebat,” katanya selepas majlis di Tanjung Malim, Perak pada 21 Disember.

Selain menyertai Pesta Buku Antarabangsa Kuala Lumpur saban tahun, Kerajaan Negeri juga menjayakan Siri Pencerahan Selangor, projek terjemahan lebih 70 karya penting yang diusahakan Inisiatif Buku Darul Ehsan (IBDE) mulai 2016.

Malah, sejak 2006 lagi, Kerajaan Negeri menganjurkan pesta buku termasuk Pesta Buku Antarabangsa Selangor (SIBF) mulai 2022. Pada tahun lalu, kira-kira 250,000 bersetuju mendapatkan buku buruan masing-masing.

Dicari peminat

Dalam pesta buku ini, karya terjemahan IBDE seperti Muhammad: Riwayat Hidup Berdasarkan Sumber Terawal (Martin Lings) dan Gelagat dan Ragam Orang Melayu (Frank Swettenham) terus dicari peminat.

Sirah karangan Lings, atau nama Islamnya Abu Bakar Sirajuddin, diusaha dengan kerjasama Perbadanan Perpustakaan Awam Selangor



(PPAS), pengajur pesta buku SIBF.

Sementara terjemahan catatan bekas residen Inggeris itu digerakkan dengan usahasama Media Selangor Sdn Bhd, penerbit Selangorkini. Karya lain termasuklah ‘Umar Al-Khattab: Kebijaksanaan Sebagai Pedang dan Perempuan Seribu Satu Malam.

Dua judul terakhir ini baharu sahaja diterbit tetapi berjaya menarik minat ramai. Kejayaan karya-karya IBDE turut dibantu pempengaruh media sosial Zainal Rashid Ahmad, berpengalaman luas dalam bidang kewartawanan dan kesusaasteraan.

Perempuan Seribu Satu Malam (AJ Arberry) menceritakan empat kisah terkenal daripada hikayat Seribu Satu Malam: Aladin dan Pelita Ajaib, Judar dan Abang-abangnya, Abukir dan Abusir, serta Tukang Emas Berahi.

Kisah ‘Umar Al-Khattab (Abbas Mahmud al-‘Aqqad) pula siri kedua selepas Abu Bakr as-Siddiq: Liku-liku Hayat & Pemerintahan Khalifah Pertama (Muhammad Hussein Haikal).

Kisah dua Khalifah al-Rasyidin ini bagi melengkapkan terjemahan sirah Nabi. Malah kali ini teks asal sirah berbahasa Inggeris juga mendapat sambutan di SIBF. IBDE merancang menterjemah dua lagi khalifah awal untuk rujukan umat Islam.

“Bagaimanapun, naskhah Muhammad: Riwayat Hidup Berdasarkan Sumber Terawal terus mendapat sambutan hangat. Buku Muhammad kekal terunggul dari hari pertama lagi,” kata Ketua Pengarang IBDE Al-Mustaqeem Mahmud Radhi pada 10 Disember.

Terus dikagumi

Buku keempat terlaris di reruai IBDE ketika SIBF, berlangsung 1-10 Disember, Salahuddin Al-Ayubi: Raja Penakluk (John Man) cuba menjelaskan mengapa tokoh ini terus dikagumi di Timur dan Barat sehingga kini.

“Kisah Salahuddin diceritakan cukup terperinci termasuk bagaimana beliau mendapat kuasa, kesukaran untuk menyatukan puak dalam agama, pertempuran mengambil kembali Jerusalem dan menghalau kuasa Kristian dari tanah Arab,” kata Mustaqeem.

Diusahakan dengan sokongan Pelan Pemulihan Ekonomi Jangka Pendek (Penjana), Perdukunan Melayu (John D Gimlette) turut laris. Berkhidmat dua dekad di Malaysia, doktor perubatan itu meneroka perubatan Melayu tradisi.

Kerajaan Negeri juga menterjemah kitab tasawuf Purification of the Heart (Hamza Yusuf) dengan judul Penyucian

Kalbu: Tanda Penyakit Hati dan Penawarnya. Buku ini olahan kitab Matharatul Qulub karangan tokoh sufi Muhammad Maulud Ya’qub.

Mustaqeem tidak menjangka SIBF kali kedua berjaya menarik suku juta pengunjung dalam tempoh 10 hari ke Pusat Konvensyen MBSA di Seksyen 13, Shah Alam, lokasi sama SIBF pada 2022.

“Penganjuran yang berbeza daripada pesta buku negeri lain menampakkan kesungguhan penganjur. Ia mencerminkan hasrat Kerajaan Selangor yang serius memasyarakatkan ilmu dan buku,” katanya.

IBDE antara 255 pempamer di SIBF. Ia juga berjaya menarik penyertaan pempamer dari negara luar antaranya United Kingdom, Turkiye, Macedonia Utara, Korea Selatan dan Mesir.

Pesta buku ini menempatkan 354 reruai jualan, selain pelbagai aktiviti menarik seperti perbincangan buku, diskau menarik dan cabutan bertuah untuk pengunjung.

Pengaruhnya Zafrullah Aris berkata pesta buku kali ini mendapat sambutan luar biasa dengan pengunjung dari pelbagai lapisan umur dan bangsa.

“Dari hari pertama nampak peningkatan ketara pengunjung berbanding tahun lepas (2022). Walaupun keadaan cuaca kurang mengizinkan, tetapi pengunjung tidak putus-putus hadir dan ini antara sedikit kejutan buat penganjur,” katanya.

10 JUDUL IBDE TERLARIS DI SIBF

- 1 Muhammad: Riwayat Hidup Berdasarkan Sumber Terawal*
- 2 Gelagat dan Ragam Orang Melayu**
- 3 Umar Al-Khattab: Kebijaksanaan Sebagai Pedang**
- 4 Salahuddin Al-Ayubi: Raja Penakluk*
- 5 Perempuan Seribu Satu Malam**
- 6 Perdukunan Melayu***
- 7 Penyucian Kalbu: Tanda-Tanda Penyakit Hati dan Penawarnya**
- 8 Muhammad: His Life Based on the Earliest Sources
- 9 Tata Dunia: Punca Perang dan Damai Sepanjang Sejarah*
- 10 Penyelamat Daripada Kesesatan*

* kerjasama dengan PPAS

** usahasama dengan Media Selangor

*** sokongan Penjana & MyCreative Ventures

Pembuka tirai sengsara



Foto Reuters

Oleh NADIAH ZAMLUS

Palestin menderita puluhan tahun. Tetapi 2023 membuka tirai kesengsaraan yang lebih getir dalam tempoh lebih singkat. Puluhan ribu nyawa melayang akibat serangan Israel di Gaza sejak hampir tiga bulan lepas.

Serangan kumpulan jihad Harakatul Muqawamatul Islamiah (Hamas) melalui udara dan darat pada 7 Oktober mencipta sejarah, mengejutkan negara Zionis dan dunia.

Namun serangan balas Israel mengorbankan 22,185 nyawa (setakat 2 Januari, hari ke-88 konflik sekarang).

Serangan udara yang bertubi-tubi, khususnya minggu-minggu awal, mengorbankan wanita dan kanak-kanak apabila kem pelarian, sekolah, masjid dan hospital dijadikan sasaran bom.

Sekurang-kurangnya 57,000 lagi cedera dalam siri konflik terbaharu yang mencipta rekod kekejaman. Penduduk dunia dan pemimpin beberapa negara termasuk bukan Islam mula melihat kezaliman tersebut.

Israel melancar serangan darat hingga ke selatan semenanjung kecil itu, dengan penduduk 2.3 juta orang, walau mereka mengarahkan warga Gaza berlindung di kawasan tersebut.

Lebih 100 kakitangan Pertubuhan Bangsa-Bangsa Bersatu (PBB) terkorban dalam serangan yang tidak pernah disaksikan seganas itu. Agensinya menaikkan bendera separuh tiang pada 13 November sebagai tanda ingatan kepada mangsa.

Kira-kira 70 wartawan, tidak termasuk keluarga dekat mereka, terbunuh (setakat 23 Disember). Satu rekod kematian yang paling ramai dalam tempoh paling singkat dalam sejarah perang.

Selain demonstrasi di seluruh kota besar dunia dan negara umat Islam, pemimpin politik, aktivis dan seniman mempersoal kenapa tindakan sekejam itu tidak disebat dan pelakunya dibawa ke muka pengadilan.

Serangan Hamas asalnya dilakukan sebagai reaksi terhadap pencerobohan masjid al-Aqsa dan rampasan tanah yang berterusan di Tebing Barat.

Namun semua cerita luka ini bukan baharu.

Sejak tertubuhnya negara haram Israel pada 1947 melalui keputusan PBB yang membahagi Palestin yang asal kepada negara Zionis Yahudi dan negara Arab Palestin bawah "mandat Britain" yang menjaga wilayah jajahannya itu.

Setahun kemudian, apabila Britain melepaskan mandatnya, Israel mengisyihar kemerdekaan. Peristiwa ini digelar Nakbah, atau malapetaka besar, dan bermulalah segala jenis kesengsaraan yang berlarutan hingga saat ini.

Hingga kini, Israel berterusan menceroboh tanah penduduk Palestin, merampas harta benda mereka. Warga Palestin dinafikan, dihalau sewenang-wenangnya dan dipenjara jika cuba melawan.

Makin zalim

Sehari selepas serangan Hamas pada 7 Oktober, Israel memperhebat serangan. Perdana Menterinya Benjamin Netanyahu berikrar pejuang Hamas dan Briged al-Qassam akan menanggung akibat dahsyat.

Situasi di Tebing Barat juga menjadi lebih buruk. Lebih banyak serbuan dan serangan yang dilakukan bagi membolehkan penempatan secara haram penduduk Yahudi berkembang di tengah-tengah perkampungan warga Palestin.

Keadaan bertambah runcing apabila Israel mula membuat kepungan menyeluruh ke atas Semenanjung Gaza. Bekalan elektrik, air dan komunikasi turut terputus.

Bekalan makanan dan ubat lambat disalurkan. Begitu juga bekalan bahan api. Pendek kata penduduk Gaza benar-benar dihimpit sengsara.

Pengerusi Muslim Care Malaysia Palestin Dr Ahmad Abu Ayesh, yang berada di Gaza pada minggu pertama serangan, menganggap tindakan rejim Zionis sebagai "paling bersejarah dan gila".

Terus angkuh, Israel pada 13 Oktober mengarahkan penduduk utara Gaza mengosongkan penempatan mereka dan berpindah ke bahagian selatan dalam tempoh 24 jam. Alasannya, tentera Israel akan menyerang di situ.

Setelah perperangan berlangsung lebih tiga minggu, hospital di Semenanjung Gaza lumpuh

sepenuhnya, kata Kementerian Kesihatan Palestin.

Hospital al-Shifaa yang menjadi tempat perlindungan 45,000 orang dan merawat lebih 600 pesakit cedera di ambang kemasuhan kerana kehabisan bekalan perubatan dan katil.

Rakyat seluruh dunia mula berang dengan kerakusan Israel. Jutaan mula berhimpun di jalanan sebagai tanda sokongan kepada Gaza.

Pada hari ke-43 serangan (18 November), lebih 12,000 rakyat Palestin terbunuh termasuk lebih 8,300 wanita dan kanak-kanak. Walaupun terus dihunjam bom, 807,000 rakyat Palestin tidak meninggalkan utara Gaza seperti diarah Israel.

Tiba-tiba pada 22 November, Israel dan Hamas bersetuju melancarkan gencatan senjata untuk tempoh beberapa hari. Ia membolehkan bantuan kemanusiaan dan pertukaran 50 tebusan Israel dengan 150 tahanan Palestin.

Laith Othman, remaja Palestin berusia 17 tahun di penjara Israel, yang dibebaskan menggambarkan sel penjaranya "malapetaka". Tahanan dibiarkan kelaparan dan tidak dibenarkan meninggalkan sel.

Tamatnya gencatan pada 30 November, Zionis terus membedil Gaza keesokannya. Hari kedua serangan, 184 penduduk lagi terbunuh dan sekurang-kurangnya 589 orang tercedera.

Jumlah ini meningkat kepada sekurang-kurangnya 15,000 orang sejak 7 Oktober.

Majlis Keselamatan PBB pada 8 Disember mengumumkan anggotanya akan mengundi bagi meluluskan resolusi desakan gencatan senjata segera dilaksanakan.

Namun Amerika Syarikat menolak cadangan itu, kononnya mendakwa draf resolusi itu tergesa-gesa dan tidak seimbang.

Setakat 8 Disember, angka kematian rakyat Palestin mencecah 20,000 mangsa termasuk 8,000 kanak-kanak dan 6,200 wanita. Jumlah mangsa sebenarnya lebih tinggi kerana beribu-ribu orang masih hilang dan tertimbus di bawah runtuhan.

Pada hari Krismas 25 Disember, sekurang-kurangnya 100 wartawan terbunuh dalam konflik tersebut. Persekutuan Wartawan Antarabangsa (IFJ) menegaskan mustahil untuk mengabaikan jumlah kematian wartawan yang sangat tinggi.



Intan Rafiza Abu Bakar dan rakannya mengadakan persembahan ketika majlis pelancaran pameran Colours for Gaza



Pelukis terkenal Ahmad Fuad Osman (kanan) berbual dengan mantan Ahli Parlimen Nurul Izzah Anwar mengenai pameran berkenaan



Darwis Menari (kiri) hasil kerja komposer terkenal Datuk M Nasir dan Ardhi Mahroo'a (maksud Tanah Yang Dirampas) karya Alysha Fahmi



Dua pelawat meneliti arca berbentuk jantung bertajuk Gaza di Hatiku karya Shafee Ramli, turut menghasilkan lukisan Gaza di Fikiranku



Pengunjung mengamati lukisan Juhari Said berjudul Dalmatian X (atas) dan Hushinaidi Abdul Hamid (Lorong Sempit)



Pengarah Galeri Putih Mohd Nizam Rahmat memberi penerangan kepada EXCO Kerajaan Selangor Najwan Halimi



Orang ramai meneliti satu daripada tiga set lukisan Azlan Mam berjudul Postcards from Jerusalem, Postcards from Gaza



Lukisan abstrak Faris Ridzwan bertajuk Northern Gate (kiri), Bayu Utomo Radjikin (Tari II) dan Suzlee Ibrahim (Red Landscape) antara lebih 100 hasil karya yang dipamerkan



Pameran Colours for Gaza di Galeri Putih, Kuala Lumpur antara 14 hingga 21 November 2023 menghimpunkan 107 karya lebih 50 artis tempatan dan antarabangsa termasuk Brazil, Turkiye dan Singapura. Seniman tempatan turut serta antaranya Awang Damit Ahmad, Datuk M Nasir, Juhari Said, Ahmad Fuad Osman, Bayu Utomo Radjikin dan Suzlee Ibrahim. Mereka menghimpunkan karya masing-

masing sebagai tanda solidariti kepada rakyat Palestin yang berdepan ancaman serangan Israel sejak 7 Oktober tahun lalu.

Semua hasil jualan dari pameran tersebut diserahkan kepada sebuah badan kemanusiaan untuk urusan bantuan kepada warga Gaza.

Jurufoto FIKRI YUSOF merakam sebahagian acara di majlis pelancaran pameran tersebut pada 15 November 2023. Keterangan gambar oleh HAFIZAN TAIB.



Beberapa pengunjung tertarik dengan lukisan berjudul October 2023 karya Ahmad Fuad Osman, pemenang anugerah peringkat kebangsaan dan antarabangsa



Penulis terkenal Faizal Tehrani menyampaikan puisi Jiwa Palestina. Turut membaca puisi Hafiz Hamzah, editor jurnal Svara



Hasil seni Hirzaq Harris berjudul Silence is Violence II mendapat perhatian pengunjung pameran



Pengunjung membeli The Blank Canvas – memuatkan ulasan, puisi, foto karya dan senarai lengkap artis yang terlibat dalam pameran



Artis Brazil Kika Goldstein bersama lukisannya Return to the Cave. Beliau antara artis luar negara yang menyertai pameran



Lukisan Dzurfazreen bertajuk Darah Syurga (kiri & kanan) dan Zulkiflee Zainul Abidin (XOXO) menghiasi Colours for Gaza

Cipta kamus genetik



*Penyelidik di Universiti
Teknologi Mara,
DR ZAMIR MOHYEDIN
seorang ahli fizik yang
menulis lapan buku*

Pada 1985, saintis perubatan bio Charles DeLisi menamatkan perkhidmatannya di Institut Kesihatan Kebangsaan (NIH), Amerika Syarikat (AS) untuk menggalas tanggungjawab baharu sebagai ketua program penyelidikan kesihatan dan tenaga di Jabatan Tenaga (DoE).

Pada masa itu, DoE mempunyai misi utama memahami dan mengenal pasti kesan produk janaan tenaga terhadap kesihatan manusia dan alam sekitar. Misalnya, apa kesan penggunaan arang sebagai sumber penjana tenaga kepada manusia dan alam.

Pendekatan DoE untuk menjalankan misi ini amat berbeza dengan NIH sepanjang pengalaman DeLisi. NIH biasanya mengambil pendekatan dengan memahami sistem pertahanan manusia seperti darah putih terhadap sesuatu penyakit.

DoE pula faham daripada kaca mata genetik. Bagaimana genetik dapat memberikan gambaran kepada kita tentang ketahanan seseorang terhadap sesuatu penyakit?

Cara DoE untuk mencapai misinya adalah dengan menunjuk genom manusia. Apa itu genom? Genom adalah maklumat genetik organisme termasuk manusia. Genom manusia terdiri daripada 23 pasangan kromosom.

Kromosom-kromosom ini pula terdiri daripada sekitar 25,000 hingga 30,000 gen. Gen gen pula terdiri daripada asid deoksiribonukleik (DNA) yang mempunyai tiga bilion pasangan bes (base pair).

Secara purata, kod DNA sesama kita mempunyai persamaan sehingga 99.9 peratus. Selebihnya sebanyak 0.1 peratus yang memberikan kita warna rambut, mata, warna kulit, ketinggian dan banyak lagi perbezaan antara kita.

Jadi sebenarnya kita jauh lebih banyak persamaan berbanding perbezaan secara genetik. Jika kita berjaya menunjuk genom seorang sahaja manusia, genom itu dapat dijadikan sebagai rujukan ataupun kamus untuk mengenal pasti sebarang masalah genetik manapun individu melalui perbezaan kod DNA.

Misalnya, jika terdapat perbezaan kod DNA antara kita dengan kod DNA daripada rujukan yang sepatutnya kod DNA itu sama, itu bermakna terdapat mutasi yang mungkin memberikan kita penyakit ataupun kelebihan tertentu.

DeLisi begitu teruja dengan projek ini dan mendapat tahu ada perbincangan menjayakan idea ini dalam persidangan di Alta dan mesyuarat di Universiti California, AS.

Tetapi sayangnya idea hanya sekadar idea. Pakar-pakar bidang menyedari projek ini memerlukan dana yang sangat banyak tetapi tiada satu pun agensi kerajaan dan industri



yang berminat.

DeLisi dan saintis biologi David Smith menganjurkan bengkel di Santa Fe, New Mexico pada 1986, mengumpulkan individu-individu yang pernah usulkan projek ini untuk DoE dan mereka yang pernah hadir di persidangan di Alta dan mesyuarat di Universiti California, serta beberapa perwakilan industri.

Objektif bengkel ini satu sahaja, DeLisi dan Smith mahu dapatkan apakah faedah, berapakah anggaran kos dan bagaimana teknik untuk jayakan projek ini. Mereka bersepakat projek ini memberikan nilai besar dalam dunia sains terutamanya dalam bidang evolusi, genetik, perubatan dan biologi sintetik. Dipendekkan cerita, projek ini memerlukan sehingga tiga bilion dolar AS.

Objektif bengkel berjaya dicapai dan mereka sudah ada pelan awal yang dapat membantu mereka dapatkan dana kerajaan. Surat jemputan pun dihantar ke pelbagai agensi kerajaan untuk mereka hantar wakil.

Ketakutan manusia

Tetapi sayangnya hanya satu surat jemputan sahaja yang mendapat maklum balas. Itu pun maklum balas menyatakan tidak berminat. Bagaimanapun, bengkel Santa Fe menyebabkan idea penjujukan genom mula mendapat perhatian luas di pentas dunia saintifik peringkat kebangsaan.

Peristiwa ini penting kerana ia dapat membantu DeLisi mendapatkan sokongan kerajaan AS. Manusia takut dan tidak berminat

dengan perkara yang mereka tidak tahu dan tidak faham.

Apabila suatu topik itu sering dibincangkan dan diwacanakan, masyarakat akan celik dan tercerah. Daripada situ, orang akan mula nampak nilai dan kepentingan penjujukan genom manusia.

Pasca bengkel Santa Fe, DeLisi mula merangka projek ini dengan tersusun kerana dia perlu menyiapkan laporan kerjanya untuk diserah kepada atasannya. Jadi, dia menghantar memo kepada Alvin Trivelpiece, pembantu setiausaha DoE. DeLisi membahagikan projek ini kepada tiga bahagian iaitu pembangunan teknologi, pemetaan dan penjujukan.

Maka lahirlah Projek Genom Manusia (Human Genome Project) yang secara rasminya dilancarkan pada 1990 setelah melalui beberapa peristiwa rumit untuk mendapatkan sokongan dan kelulusan daripada Kongres AS. Projek ini dijangka mengambil tempoh 15 tahun untuk siap.

Projek ini mendapat perhatian di peringkat antarabangsa. Jepun, Jerman, United Kingdom, China dan Perancis menyertai projek ini dan menjadikan penjujukan genom manusia dapat disiapkan dengan lebih cepat daripada jangkaan.

Malah, kos perbelanjaan dapat dikurangkan. Saintis mengambil tempoh berpuluhan tahun untuk kenal pasti pasangan bes ini yang menelan belanja sehingga tiga bilion dolar AS. Melibatkan ratusan saintis dan berdozen negara. Amnya, projek ini dilancarkan bagi memahami dan mengenal pasti seluruh jujukan DNA manusia.



Rezeki madu kelulut

Oleh NAZLI IBRAHIM
Foto NUR ADIBAH AHMAD IZAM

Bimbang tiada pendapatan bulanan selepas bersara, Faridah Khalid, 61, mencebur perniagaan madu kelulut. Dia mendapat idea apabila ternampak sarang kelulut di halaman rumah bapa saudara di Kuantan, Pahang.

Bermodal RM30,000, ibu sembilan anak itu memulakan projek menternak kelulut dengan bantuan suami Wan Ahmad Fuad Wan Abd Aziz, 64, pada September 2016.

Selepas tujuh tahun, usahanya membuat hasil. Anak jati Petaling Jaya itu kini memiliki 300 sarang di Kampung Seberang di Dusun Tua, Hulu Langat dan Pusat Flora Cheras yang menghasilkan lebih 800 kilogram (kg) madu asli setahun.

Selain menjual madu tersebut, beliau juga menghasilkan 13 produk hiliran atas jenama Kelulut Kasih seperti minuman, sabun muka, sabun badan dan minyak propolis.

Menerima pelbagai pengiktirafan, Faridah dinobat sebagai Ikon Agro Selangor 2022 yang disampaikan EXCO Pertanian Ir Izham Hashim pada 31 Oktober 2023.



Kurang ilmu

Mengimbau tempoh awal sebagai usahawan tani, Faridah berkata segalanya bermula selepas mengakhiri perkhidmatan 33 tahun dalam sektor perbankan melalui skim pemberhentian sukarela.

Beliau kemudian menternak kelulut di kawasan rumah dengan 30 sarang di Kampung Seberang.

"Dua dunia yang betul-betul berbeza, orang kata perubahan 360 darjah. Bila tengok kelulut ini beri saya ketenangan," kata Faridah kepada Selangorkini pada 16 November tahun lalu.

Menyedari dirinya kurang ilmu, Faridah mendapat khidmat nasihat Institut Penyelidikan dan Kemajuan Pertanian Malaysia (Mardi) dan Universiti Malaysia Terengganu.

Ketika itu, tidak banyak agensi kerajaan yang boleh membimbing kerana kajian penternakan kelulut masih kurang.

Nasib Faridah baik. Ada kenalan yang mahir penternakan kelulut sudi memberi tunjuk ajar.

"Bila datang seorang 'otai' ternak kelulut, barulah tahu rupanya cara pindahkan telur kelulut salah, tak ada ratu kelulut menyebabkan kelulut tinggalkan sarang," katanya.

Selepas enam bulan, barulah Faridah

memperoleh tuaian pertama, walau terlalu sedikit. Setahun kemudian, beliau berdepan pula masalah cuaca panas.

Keadaan itu tidak sesuai untuk kelulut untuk menghasilkan madu dan diburukkan lagi kebakaran kecil di hutan berhampiran, menyebabkan hasil kurang 10kg setiap kali tuai.

Pada 2018, tuaian madu meningkat dari 60kg pada awal tahun hingga mencecah lebih 100kg sekali tuai. Pada tahun itu, mereka memperoleh lebih 400kg madu.

Usaha Faridah mendapat perhatian Jabatan Pertanian Selangor. Dia menerima geran menambah aset seperti kabin, peti penyejuk, peti sejuk beku, mesin pengering, pendingin hawa, kabinet, meja tahan karat dan pam madu.

Penternakan kelulut Faridah turut menerima pensijilan halal, Skim Pensijilan Organik Malaysia (myOrganic) dan Skim Pensijilan Amalan Pertanian Baik Malaysia (myGAP).

Bagi menambah pengetahuan, Faridah menyertai pelbagai kursus dalam talian dengan organisasi luar negara yang maju dalam ternakan serangga berkenaan.

Madu dijual RM350 sekilo dan produk hiliran keluaran Kasih Hulu Langat Enterprise itu dipasarkan dalam talian dan jualan di ladang.

Ia membolehkan Faridah dan suami meraih jualan antara RM6,000 hingga RM8,000 sebulan, sekali gus menarik nafas lega kerana masih ada pendapatan walau bersara.

Idea lawan idea



MARWAN BUKHARI A HAMID
ialah penulis dan penterjemah.
Lulusan Universiti Yarmouk,
Jordan dan Universiti
Sains Islam Malaysia

Sejauh manakah kebebasan berpandangan dan berwacana intelektual terjamin dalam pemerintahan Islam? Adakah pemerintahan Islam hanya membenarkan kajian dan wacana intelektual yang seiring dengan pegangan Islam ataupun turut membuka ruang kepada pandangan lain meskipun bermasalah dengan perspektif Islam?

(1) Imam Muhammad al-Tahir Ibn 'Ashur (1879-1973) ialah salah seorang ulama terkemuka pakar pelbagai bidang dari Tunisia abad yang ke-20. Menurutnya, pemikiran bermasalah yang lahir dalam umat Islam mungkin perlu ditekan supaya tidak tersebar hingga menarik minat kelompok yang lalai.

Namun, setelah membuat pertimbangan antara kemaslahatan memelihara pemikiran umat dengan mafsaadah atau bahaya terbesar berbentuk penindasan pemikiran, maka beliau memutuskan untuk menghormati pemikiran meskipun yang bermasalah menurut Islam.

Tambahnya lagi, kajian dan kritikan hendaklah menjadi piawaian untuk membezakan antara fikiran buruk dan baik, sementelah kebenaran akan sentiasa menewaskan kebatilan.

Menariknya apabila Ibn 'Ashur menegaskan bahawa sekiranya kita menindas pemikiran, maka kebatilan akan bercampur dengan kebenaran. Kesannya boleh menyebabkan golongan batil yang ditekan itu mendapat simpati dan sokongan. Hal ini lebih buruk berbanding membiarkan sesuatu pemikiran dibentang kritikan dan hujah terhadapnya.

Kesimpulan Ibn 'Ashur, menghormati pemikiran dan membiarkan wacana intelektual bergerak lebih baik meskipun terhadap idea-idea yang bermasalah menurut Islam. Apakah lagi kalau dalam kerangka pemikiran Islam meskipun wujud perbezaan.

Inilah juga pendirian pemikir besar dan



1

berpengaruh dari Mesir, (2) Dr Muhammad 'Imarah (1931-2020). Antaranya ialah hujahnya yang membungkam dakwaan-dakwaan sosok kontroversi, Dr Nasr Hamid Abu Zayd.

Selain debat antara mereka yang masih ada rakamannya di Youtube, Dr Imarah juga mengarang satu buku mengenai idea Abu Zayd berkaitan tafsiran berorientasi Marxisme terhadap Islam.

Kritikan itu dibuat secara sistematik hasil kajian kritis terhadap seluruh buku dan kertas kerja tulisan Abu Zayd. Bagi beliau, buku lawannya buku, pemikiran lawannya pemikiran, bukannya dilawan dengan pengharaman buku/wacana.

Kebebasan rakyat

Demikian juga pandangan ahli fiqh dan perundangan besar Arab, (3) Muhammad Salim al-'Awwa (1941-sekarang). Dalam bukunya "al-Haq fi al-Ta'bir", al-'Awwa

berpendirian bahawa isu-isu pemikiran dan perbezaan pandangan hendaklah diselesaikan menerusi kritikan yang mendedahkan kepincangan sesuatu kajian.

Sementara itu, seorang ulama besar dan terkenal dalam pelbagai bidang termasuk Usuluddin, fiqh dan tasawuf iaitu (4) Sheikh Dr Said Ramadan al-Buti (1929-2013) menyebut satu fenomena menarik dalam sejarah peradaban Islam.

Dr al-Buti berkata: "Saya menegaskan bahawa sekiranya ada mana-mana negara Islam berpeluang untuk melaksanakan syariat Allah sebagaimana diperintahkan oleh Allah dan sebagaimana yang dilaksanakan oleh Rasulullah SAW, maka negara itu hendaklah memelihara kebebasan rakyat dan memberi tumpuan untuk menjaga kebebasan itu."

Saya telah menyebut banyak dalil tentang hal ini sebelum ini (iaitu dalam buku Yughalitunak Idh Yaqulun). Saya juga telah menjelaskan pendirian pemerintahan Islam terhadap firqah-firqah terpesong yang bertambah banyak pada kurun kedua.

Semua firqah itu terpesong daripada Islam,

malah sebahagiannya mungkin tergelincir dalam kekufturan.

Meskipun begitu, pemerintahan Islam tidak mengambil pendirian merampas kebebasan firqah-firqah itu, tidak menghukum sesiapa dalam kalangan pemuka-pemukanya.

Mereka juga tidak menghalang orang ramai daripada mengungkapkan pandangan dan pemikiran mereka. Sebaliknya pemerintahan Islam berpegang dengan satu perkara lain iaitu kebebasan berdialog dan berdiskusi."

Menyediakan kebebasan intelektual dan akademik tidak bermaksud bersetuju dengan dakwaan dan hujah yang dikemukakan dalam sesuatu buku dan pembentangan.

Perhatikan kenyataan al-Buti yang menyebut tentang firqah-firqah terpesong itu. Itu bukan bererti beliau menyokong keterpesongan, tetapi sedang menekankan kepentingan jaminan kebebasan berkeyakinan dan intelektual oleh pemerintahan Islam.

Al-Buti menyebut dua syarat bagi kebebasan ini, kedua-duanya berkait dengan syarat tidak berselindung di sebalik agenda dari luar negara ataupun dalam negara untuk menjatuhkan atau menebuk atap sesebuah pemerintahan. Jika dikenal pasti agenda itu, maka menurutnya boleh dikekang kebebasan itu.

Boleh juga difikirkan parameter lain, contohnya sesebuah negara boleh mengecualikan masjid dan surau daripada program sebegini kerana sasaran pendengar dan peserta berbeza.

Program yang sesuai di universiti dan institusi pemikiran tentulah tidak sama dengan program yang dibuat di masjid dan surau yang terlalu luas hadirinya dan berkemungkinan majoritinya tidak bersedia dengan perbincangan sebegini.

Akhirnya, fiqh kenegaraan kita perlu lebih jelas dalam soal ini kerana mentadbir negara bukan mentadbir persatuan atau organisasi Islam. Apakah lagi banyak negara Islam zaman moden ini secara umumnya menjamin kebebasan intelektual akademik sebegini dalam perlombagaan mereka.


Fiqh kenegaraan dalam Islam bukan sekadar menukilkan secara harfiah pandangan daripada kitab silam, tapi perlu memahami realiti negara moden dan juga konteks tempatan.

Termasuk dalam fiqh ini ialah tentang bagaimana polisi sesebuah pemerintahan Islam terhadap kepelbagaiannya pemikiran walaupun yang tidak islamik.

Artikel ini telah menyelongkar beberapa pandangan relevan, terserah kepada anda sama ada bersetuju atau tidak.



3



2



4



Anwar bersama Mohd Nassuruddin melawat mangsa banjir di pusat pemindahan sementara Sekolah Menengah Kebangsaan Agama Lati, Pasir Mas, Kelantan pada 28 Disember. Foto Bernama

Keluarga terima RM1,000

RM50 juta bantu mangsa banjir

Oleh AFEEQA ABDUL RASOL

SHAH ALAM - Perdana Menteri Datuk Seri Anwar Ibrahim mengumumkan peruntukan awal RM50 juta untuk membantu mangsa banjir di Kelantan.

Beliau berkata dana daripada Agensi Pengurusan Bencana Negara (Nadma) akan disalur kepada mangsa yang terjejas akibat musibah itu, lapor Berita

Harian.

"Bagi mangsa banjir yang berada di pusat pemindahan sementara (PPS), setakat ini kita meluluskan peruntukan awal RM50 juta.

"Menerusi peruntukan berkenaan, setiap keluarga akan menerima RM1,000 dan tambahan bantuan lain bergantung pada kerugian yang dialami mangsa banjir," katanya.

Beliau melawat PPS Sekolah Mene-

ngah Kebangsaan Agama Lati di Pasir Mas bersama Menteri Besar Kelantan Datuk Mohd Nassuruddin Daud pada 28 Disember.

Anwar turut berterima kasih kepada semua pihak meliputi jentera kerajaan persekutuan dan kerajaan negeri yang membantu mangsa banjir.

"Apa yang penting, kita mahu meredakan tekanan yang dialami rakyat akibat banjir," katanya.

Lulus dana bina benteng sementara

SHAH ALAM - Kerajaan meluluskan peruntukan RM6 juta untuk membina benteng sementara bagi Projek Pembangunan Lembangan Sungai Bersepadu (PLSB) Sungai Golok di Rantau Panjang, Kelantan.

Perdana Menteri Datuk Seri Anwar Ibrahim berkata benteng itu perlu dibina secepat mungkin meliputi tiga tempat yang dikenal pasti melalui peruntukan masing-masing bernilai RM2 juta.

"Permohonan Jabatan Pengairan dan Saliran (JPS) negeri bernilai RM6 juta diluluskan segera dan perlu dilakukan secepat mungkin," katanya seperti dilapor

Bernama.

Sebelum ini, benteng PLSB Sungai Golok di Rantau Panjang pecah mengakibatkan air Sungai Lanchang mengalir ke Sungai Golok.

Anwar menambah Kerajaan Kelantan juga bersetuju untuk menyegerakan proses pengambilan tanah bagi membolehkan projek PLSB Sungai Golok Fasa 2 dilaksanakan dalam tempoh terdekat.

Beliau berkata peruntukan tambahan RM800 juta juga diluluskan bagi mempercepat pelaksanaan projek itu yang dijangka bermula awal tahun 2024.

"Kita terpaksa ambil langkah segerakan pelaksanaan projek PLSB Fasa 2 di Rantau Panjang, kerana ia ternyata mampu mengurangkan tekanan banjir di situ," katanya.

Projek PLSB Sungai Golok dibina dalam tiga fasa membabitkan peruntukan lebih RM2 bilion yang diyakini melindungi 31,000 penduduk dan kawasan seluas 66,000 hektar daripada banjir.

Anwar juga memberitahu lima projek baharu bagi mengatasi masalah banjir di Kelantan akan memulakan proses perolehan dengan kos keseluruhan dijangka berjumlah RM910.52 juta.

Permohonan sijil halal meningkat

SHAH ALAM - Jabatan Kemajuan Islam Malaysia (Jakim) menerima 15,605 permohonan Sijil Pengesahan Halal Malaysia sepanjang 2023 berbanding 14,977 pada tahun sebelumnya.

Ketua Pengarah Jakim Datuk Hakimah Mohd Yusoff berkata 8,509 permohonan diluluskan melibatkan 132,106 produk dipersijil halal manakala jumlah fi ialah RM11.035 juta, lapor Bernama.

"Produk yang dipersijilkan halal meliputi skim produk makanan dan minuman, farmaseutikal, kosmetik, bahan gunaan dan peranti perubatan," katanya dalam kenyataan pada 3 Januari.

Beliau juga menjelaskan pencapaian berkenaan menyumbang kepada kedudukan Malaysia untuk mengekalkan tempat pertama daripada 81 negara bagi tahun ke-10 berturut-turut.

21,822 rakyat Palestin terkorban

SHAH ALAM - Operasi ketenteraan Israel di Semenanjung Gaza sejak 7 Oktober mengorbankan 21,822 rakyat Palestin dan mencederakan 56,451 lagi, menurut Kementerian Kesihatan di Gaza.

Angka setakat 31 Disember itu termasuk 150 rakyat Palestin yang terbunuh manakala 286 lagi cedera dalam tempoh 24 jam, lapor Bernama yang memetik agensi Anadolu dari Istanbul.

Antara yang terbunuh ialah 312 profesional penjagaan kesihatan dan 40 anggota pertahanan awam selain 106 wartawan manakala lebih 7,000 lagi mangsa masih terperangkap bawah runtuhan.

Sebanyak 290,000 rumah, 285 institusi pendidikan (285), 208 masjid (208) dan gereja (tiga) rosak teruk selain mengakibatkan 25 hospital dan pusat kesihatan (53) tidak lagi berfungsi.

Akibat kezaliman itu, hampir dua juta penduduk kehilangan tempat tinggal di wilayah yang padat selain berdepan masalah kekurangan makanan dan air bersih.

Tiga tan sampah ambang 2024

SHAH ALAM - Sebanyak 3.06 tan sampah dikutip di sekitar Kuala Lumpur selepas sambutan ambang tahun baharu 2024 Isnin lalu, kata pengurus kawasan operasi (utara) Alam Flora.

Menasihati masyarakat supaya mengubah gaya hidup lebih bersih, Anuar Mohd Shah berkata jumlah itu meningkat berbanding 2.98 tan sampah dalam sambutan sama tahun lalu, lapor Harian Metro.

Beliau juga memaklumkan syarikat berkenaan juga mengutip 700,000 tan sampah di seluruh ibu negara sepanjang tahun lalu, meningkat empat peratus berbanding 2022.

"Jumlah ini bersamaan 1,900 hingga 2,000 tan sampah sehari," katanya.

Perbaharui lesen guna aplikasi

SHAH ALAM - Orang ramai boleh memperbaharui cukai jalan kenderaan atau lesen kenderaan motor (LKM) dan lesen memandu (LMM) menerusi aplikasi MyJPJ mulai Februari.

Selain menjimatkan masa dan kos, menteri pengangkutan berkata kemudahan itu mengurangkan kesesakan urusan fizikal di kaunter Jabatan Pengangkutan Jalan (JPJ), lapor Berita Harian.

"Pelaksanaan urus niaga pembaharuan LKM melalui aplikasi ini dilaksanakan secara berfasa yang mana pada peringkat permulaan hanya melibatkan kenderaan persendirian individu (warganegara).

"Untuk menggalakkan penggunaan e-LMM, individu yang memilih Lesen Memandu Malaysia Digital ketika pembaharuan menikmati rebat RM5 mulai 1 Februari hingga 31 Disember," kata Anthony Loke.

Inisiatif tersebut tidak terpakai kepada warga asing atau pemegang pas, permit jangka masa panjang, kad pengenalan pemastautin sementara serta kad pengenalan pemastautin tetap.

Selangor catat kes nahtes tertinggi

SHAH ALAM - Sebanyak 598,635 kemalangan jalan raya berlaku di seluruh negara sepanjang tahun lalu, kata timbalan pengarah Jabatan Siasatan dan Penguatkuasaan Trafik Bukit Aman.

Datuk Mohd Nasri Omar menjelaskan 12,417 kes melibatkan kematian manakala 2,331 kes parah dan 28,511 kemalangan ringan, selebihnya hanya kerosakan kendaraan, lapor Bernama.

Beliau menambah Selangor mencatat bilangan kemalangan tertinggi iaitu 173,129 kes, diikuti Johor (87,370 kes) dan Kuala Lumpur (72,701 kes).

Katanya, negeri berkenaan juga merekod angka kematian paling tinggi iaitu 2,092 orang disusuli Johor (2,010) dan Perak (1,321).

Tiada varian baharu Covid-19 dikesan

SHAH ALAM - Tiada varian baharu Covid-19 dikesan di negara ini dan situasi kekal terkawal berikutan kebanyakan kes melibatkan gejala ringan dan tidak memerlukan rawatan di hospital.

Menteri Kesihatan Datuk Seri Dr Dzulkefly Ahmad menjelaskan varian yang menukar antaranya Omicron, dengan subvarianya XBB.1.16, XBB.1.5, EG.5 dan termasuk JN.1, lapor Bernama.

Beliau menambah kemasukan pesakit Covid-19 yang dirawat di hospital antara 17 hingga 23 Disember hanya pada kadar 0.5 peratus manakala kadar kematian 0.08 peratus.

"Virus Covid-19 akan terus berada bersama kita sama seperti virus salur pernafasan yang lain seperti influenza," katanya.

Hasrat dirikan masjid di Palestin

SHAH ALAM - Kerajaan Selangor mahu mewujudkan perumahan dan masjid bagi membantu membina semula Palestin yang musnah dibedil rejim Israel sejak Oktober tahun lalu.

Dato' Menteri Besar menjelaskan komitmen berkenaan bertujuan membantu Majlis Perundingan Pertubuhan Islam Malaysia (Mapim) untuk mewujudkan Bandar Malaysia selepas perang selesai.

Dato' Seri Amirudin Shari menambah pentadbiran negeri juga sedia meneliti kemungkinan untuk membina kelengkapan dan kemudahan lain demi keperluan anak-anak Palestin.

"Mapim bina 10 masjid di sana seperti Masjid Kampung Tunku, Surau Annur Bangi. Insya-Allah Kerajaan Negeri akan bekerjasama dengan masjid-masjid (di Selangor) untuk bina sebuah lagi.

"Ini hasil sumbangan negeri serta sumbangan hasil kutipan yang dibuat dari masa ke masa," katanya dalam program Panggilan Intifada Doa Untuk Palestin di sini pada 31 Disember.

Pada Oktober, Amirudin menyeraikan sumbangan negeri RM1 juta kepada Akaun Amanah Kemanusiaan Rakyat Palestin (AAKRP) bagi mengurangkan kesengsaraan rakyat Palestin.

Elak manfaat dinikmati maha kaya

Pangkalan data elak penipuan subsidi

SHAH ALAM - Pengenalan Pangkalan Data Utama (Padu) selaras pendekatan transformasi digital negara dengan janinan setiap kemudahan kerajaan akan dinikmati penerima yang berhak.

Perdana Menteri Datuk Seri Anwar Ibrahim berkata setiap ketirisan dalam penyaluran bantuan dan subsidi kerajaan dapat dielak menerusi sistem yang lebih canggih, lapor Bernama.

Beliau yang juga menteri kewangan menegaskan penyaluran subsidi tanpa pendekatan digital sedemikian hanya menyebabkan golongan maha kaya dan warga asing mendapat manfaat.

Katanya, pemberian subsidi pada masa ini mencecah RM80 bilion setahun sekali gus membebankan pengurusan kewangan negara jika keadaan berkenaan ber-

larutan tanpa diatasi sebaik-baiknya.

"Perlu tekad baharu dan jangan tolak ansur kerana tanpa Padu, terlalu banyak ketirisan, banyak kebocoran dan penipuan."

"Kalau tidak, tidak ada sebab masih ada kelompok miskin dalam negara," katanya ketika melancarkan sistem berkenaan di Putrajaya pada 2 Januari.

Padu adalah pangkalan data ekonomi bersepadu yang menggabungkan maklumat daripada jabatan dan agensi kerajaan bagi memberi gambaran kedudukan sosioekonomi setiap isi rumah penduduk.

Sistem yang dibangunkan penjawat awam memuatkan profil individu dan isi rumah meliputi warganegara dan pemastautin tetap di Malaysia.

Dibuka kepada orang ramai mulai 2 Januari hingga 31 Mac, Padu membantu penduduk berumur 18 tahun ke atas mendaftar, mengemas kini dan mengebahkan 39 maklumat peribadi masing-masing.

Anwar menambah keupayaan membina Padu juga menunjukkan jentera kerajaan mampu melaksanakan perkara baharu tanpa bergantung kepada konsultan antarabangsa yang melibatkan kos tinggi.

Menyatakan keupayaan membangunkan sepenuhnya kakitangan Kementerian Ekonomi, Jabatan Perangkaan serta Unit Pemodenan Tadbiran dan Perancangan Pengurusan Malaysia dengan kerjasama agensi lain.

Skim gaji penjawat awam disegera

SHAH ALAM - Perdana Menteri Datuk Seri Anwar Ibrahim menegaskan pelaksanaan skim upah yang lebih adil dan munasabah untuk penjawat awam akan disegerakan.

Beliau yang juga menteri kewangan berkata skim itu tidak dilaksanakan Kerajaan Perpaduan pada tahun lalu berikutan kedudukan kewangan negara mewarisi hutang tinggi, lapor Bernama.

"Kita memutuskan untuk menyegerakan pelaksanaan skim upah yang lebih

adil dan munasabah kepada penjawat awam, dan saudara harus percaya.

"Kita tidak menyegerakannya pada tahun lalu kerana kita mewarisi kedudukan kewangan dan hutang negara ketika itu masih RM1.5 trilion dan defisit 5.6 peratus," kata beliau.

Anwar berucap melancarkan sistem Pangkalan Data Utama (Padu) yang mengandungi profil individu dan isi rumah meliputi warganegara dan pemastautin tetap di Malaysia di Putrajaya

pada 2 Januari.

Pada 14 Julai, kerajaan bersetuju mengkaji semula sistem saraan perkhidmatan awam dengan mengambil kira peningkatan kos sara hidup dan tiadanya semakan gaji dibuat sejak 2012.

Justeru, mesyuarat Jawatankuasa Kabinet Pembaharuan Perkhidmatan Awam diadakan pada Ogos bagi membincangkan Kajian Sistem Saraan Perkhidmatan Awam sebagai pembaharuan perkhidmatan awam.

Bantuan untuk pusat ibadah

SHAH ALAM - Kerajaan persekutuan sedia mempertimbang bantuan kepada masjid dan surau yang terjejas banjir meski institusi berkenaan dalam bidang kuasa kerajaan negeri.

Mengakui tiada peruntukan khusus untuk musibah itu, Menteri Hal Ehwal Agama Dato' Setia Dr Mohd Na'im Mokhtar berkata pihaknya sedia mewujud bantuan jika ada permohonan,

lapor Bernama.

"Cuma ada sesetengah agensi agama seperti Yayasan Pembangunan Ekonomi Islam Malaysia (YaPEIM) dan Yayasan Dakwah Islamiah Malaysia (Yadim) yang ada peruntukan diberi kerajaan."

"...ada bahagian tertentu pada peruntukan itu untuk bantuan kepada mereka yang terkesan jika berlaku kecemasan, musibah atau sebagainya," ka-

tanya di Jerantut pada 30 Disember.

Pengagihan bantuan itu melibatkan 29 ketua isi rumah di Jerantut dan 125 di Raub, masing-masing menerima sumbangan wang tunai serta barang keperluan dapur dan kit solat.

Selain Jerantut, daerah yang dilanda banjir antaranya Raub, Lipis, Kuantan, Temerloh, Maran dan Bera yang secara kumulatifnya melibatkan 1,078 mangsa.



Kor Ming (dua, kanan) bersama Timbalan Datuk Bandar Subang Jaya Mohd Zulkurnain Che Ali (kanan) meninjau keadaan tandas awam di Pasar Bazar Rakyat Seri Kembangan, Subang Jaya pada 28 Disember. Foto AHMAD ZAKKI JILAN

Tingkat kemudahan pasar

Tambah RM100,000 bina tandas baharu

Oleh **SHEEDA FATHIL**

SUBANG JAYA - Kementerian Perumahan dan Kerajaan Tempatan (KPKT) mengumumkan tambahan RM100,000 bagi membina tandas awam baharu di Pasar Bazar Rakyat, Seri Kembangan di sini.

Sebelum ini, kementerian itu meluluskan RM300,000 untuk naik taraf pasar berkenaan melibatkan kerja mengecat dinding, membaik pulih kerangka dan pintu besi serta

menyelenggara longkang.

Menterinya Nga Kor Ming berharap tandas baharu itu dapat mematuhi piawaian bertaraf 'BMW' iaitu bersih, menawan dan wangi, sekali gus memberi keselesaan kepada pengguna.

"Kita sudah menyiapkan fasa baik pulih pasar ini tetapi masih ada beberapa kelengkapan yang perlu dipertingkat lagi antaranya tandas (bina baharu) dan tambahan kipas."

"Atas permintaan wakil rakyat Puchong dan Seri Kembangan, saya

bersetuju untuk tambah RM100,000 (bagi tandas dan kipas) yang akan dikendalikan Majlis Bandaraya Subang Jaya," katanya.

Beliau mengadakan siri lawatan terakhir program Sentuhan Kasih KPKT di pasar berkenaan di sini pada 28 Disember.

Menerusi siri lawatan itu, Kor Ming turut mengumumkan pihaknya menjelajah ke semua negeri di Malaysia dengan memperuntuk RM700 juta bagi pelaksanaan 5,196 projek tahun ini.

Perbaiki laluan pejalan kaki, basikal

SHAH ALAM - Majlis Perbandaran Klang (MPK) akan menaik taraf laluan pejalan kaki dan basikal sebagai inisiatif ke arah Klang Bandaraya Mampan.

Yang Dipertua Datin Paduka Noraini Roslan berkata perbincangan terperinci mengenai usaha itu sedang giat dilakukan.

"Selain memfokuskan kepada penyediaan dan naik taraf laluan se-dia ada, turut dibincangkan cadangan penyediaan lorong pejalan kaki dan

basikal baharu yang membolehkan kesinambungan rangkaian kemudahan itu mengikut fasa pembangunan sehingga tahun 2030," katanya.

Beliau mempengaruhi mesyuarat penuh Disember MPK yang ber-siaran secara langsung menerusi Facebook Live MPKlang, pada 28 Disember.

Pada 9 Disember, laluan jalan kaki di Jalan Pasar dinaik taraf dengan ukuran keluasan enam meter (m) berbanding sebelum ini 1.5m.

"Satu daripada empat lorong di sepanjang 800m Jalan Pasar akan diubah, dari Jambatan Musaeddin ke selekoh jalan di Lebuh Tapah.

"Laluan pejalan kaki yang dilebarkan itu turut menyediakan kemudahan untuk golongan orang kurang upaya seperti laluan 'tactile'. Laluan ini juga sebahagian daripada pelan pembesaran laluan Warisan Bandar Diraja Klang sejauh tiga kilometer," katanya.

Larangan memancing di taman rekreasi

SHAH ALAM - Majlis Bandaraya Petaling Jaya (MBPJ) menguat kuasa larangan memancing di semua taman awam kecuali Taman Bandaran Kelana Jaya.

MBPJ memaklumkan peraturan baharu bermula 1 Januari tertakluk bawah Undang-undang Kecil Taman Majlis Perbandaran Petaling Jaya 2005.

Bagi aktiviti memancing di Taman Bandaran Kelana Jaya, pemancing perlu mendapatkan pas bulanan RM30 atau tahunan RM240 bagi setiap joran.

"Waktu memancing yang ditetapkan adalah pada Sabtu, Ahad dan hari kelepasan am antara jam 7 pagi hingga 7 petang," katanya di Facebook.

MBPJ turut melarang penggunaan peralatan memancing yang boleh mengancam keselamatan pengunjung.

RM10 juta naik taraf kemudahan awam

HULU SELANGOR - Majlis Perbandaran Hulu Selangor (MPHS) memperuntuk hampir RM10 juta bagi projek pembangunan dan naik taraf prasarana awam tahun ini demi keselesaan penduduk.

Yang Dipertua Mohd Hasry Nor Mohd berkata jumlah itu 10 peratus daripada keseluruhan kutipan hasil iaitu lebih RM96 juta tahun lalu.

"Kita akan gunakan 10 peratus daripada rizab ini untuk naik taraf kemudahan merangkumi dewan, jalan, longkang, pasar awam serta tandas.

"Kita mahu cukai dibayar penduduk dapat dikembalikan dengan memberi perkhidmatan lebih baik. Kita mahu se-diakan kemudahan sebaiknya," katanya baru-baru ini.

Tawar 869 tapak bazar Ramadan

SHAH ALAM - Majlis Perbandaran Kuala Selangor (MPKS) membuka permohonan permit permohonan bazar Ramadan dan Aidilfitri meliputi 14 lokasi mulai 3 Januari.

MPKS memaklumkan 869 petak untuk bazar Ramadan ditawar pada harga bermula RM300 hingga RM400 dan RM150 hingga RM400 bagi 316 petak bazar Aidilfitri.

Permohonan dalam talian dibuka sehingga 17 Januari di pautan ip3ks.mpks.gov.my/. Pertanyaan lanjut hubungi Jabatan Pelesenan MPKS di talian 03-3289 1439 sambungan 184.

MPKS memaklumkan, peniaga yang berminat perlu bebas daripada tindakan kompaun pihak berkuasa tempatan selain melampirkan dokumen sokongan diperlukan.

Peniaga juga digalakkan berdaftar dengan aplikasi perniagaan dalam talian Platform Selangor (PLATS) serta tambahan bayaran sebanyak RM60 bagi gerai air tebu dan air kelapa.

Mohon tingkatan satu hingga 15 Jan

SHAH ALAM - Permohonan program Rancangan Khas Pendidikan Yayasan Selangor (RKPYS) Kementerian Pendidikan Malaysia (KPM) untuk pelajar tingkatan satu dibuka hingga 15 Januari.

Tarikh akhir penghantaran dokumen permohonan khusus kepada pelajar daripada keluarga berpendapatan rendah itu pada 26 Januari.

"Antara kriteria kelayakan permohonan mendapat sekurang-kurangnya TP3 untuk semua mata pelajaran Pentaksiran Bilik Darjah Tahun 6 sekolah rendah.

"Pelajar juga bersekolah di sekolah rendah atau swasta yang berdaftar di KPM dengan keutamaan diberikan kepada pelajar luar bandar," kata kenyataan.

Pemohon atau ibu atau bapa mestilah lahir di Selangor atau bermastautin sekurang-kurangnya 10 tahun serta pendapatan ibu bapa kurang RM2,000 sebulan. Maklumat lanjut layari pautan yayasanselangor.org.my

Terima RM30,000 sumbangan swasta

SHAH ALAM - Perbadanan Wakaf Selangor (PWS) menerima sumbangan wakaf tunai korporat daripada syarikat swasta Aiman Platinum Sdn Bhd.

Agensi itu memaklumkan RM30,000 sumbangan wakaf diterima PWS yang disampaikan di Plaza Azalea, Seksyen 14, di sini.

"PWS menzahirkan setinggi-tinggi penghargaan kepada seluruh warga kerja Aiman Platinum Sdn Bhd di atas sokongan dalam melaksanakan ibadah wakaf ini," katanya menerusi Facebook.

Majlis serahan disempurnakan Pengarah Aiman Platinum Aiman Firdaus Tan Abdullah dan diterima oleh Timbalan Ketua Pegawai Eksekutif PWS Anuar Hamzah Tohar pada 28 Disember.

Yayasan buka bantuan Aidilfitri

SHAH ALAM - Yayasan Islam Darul Ehsan (Yide) membuka pendaftaran anak yatim Selangor untuk menerima sumbangan Aidilfitri sehingga 27 Januari.

Agensi tersebut memaklumkan pendaftaran boleh dibuat dalam talian melalui pautan www.epayns.com.my. Pendaftar perlu mencetak borang yang lengkap diisi.

Mereka juga perlu melampirkan kad pengenalan anak yatim dan ibu atau penjaga, sijil kematian bapa dan slip akaun bank untuk pengesahan nazir masjid.

Borang lengkap boleh dipos atau dihantar kepada Yide di alamat No 3, Jalan Keluli AM7/AM, Pusat Perniagaan Bukit Raja, Seksyen 7, 40000 Shah Alam, Selangor.

Maklumat lanjut hubungi Pegawai Yide (Zubair), di talian 017-756 9476.

RM229,000 baik pulih lima masjid

SHAH ALAM - Lembaga Zakat Selangor (LZS) mengagih RM229,000 bagi menampung kos membaik pulih lima masjid di Kuala Selangor.

Agensi itu memaklumkan Masjid Darul Falah, Jeram, Masjid Nurul Hasanah, Kuala Selangor dan Masjid Ar Ridzuan, Bestari Jaya masing-masing menerima RM50,000 pada 26 Disember.

Selain itu, sumbangan RM40,000 turut diberi kepada Masjid Al-Awwabin, Bestari Jaya dan Masjid Darussolihin, Tanjung Karang (RM39,000).

"Majlis serahan sumbangan di Masjid Al-Awwabin Bestari Jaya turut disertai oleh Pegawai Tadbir Agama Daerah Kuala Selangor Nasrul Hadi Rohani dan Ketua Jabatan Pengurusan Operasi Agihan Daerah Zainudin Johari," katanya

menerusi Facebook.

LZS berharap sumbangan berkenaan membantu menambah baik kemudahan masjid supaya lebih kondusif dan selesa selari dengan keperluan umat Islam.

"Marilah bersama-sama kita menuaikan tanggungjawab berzakat kepada LZS agar lebih banyak lagi keperluan fisabilillah dapat disantuni," katanya.

Sedia platform permudah sumbangan

Infak bina asrama anak yatim

Oleh **SOFIA NASIR**

SHAH ALAM - Yayasan Islam Darul Ehsan (Yide) mempelawa orang ramai memberi sumbangan bagi membina Kompleks Asrama Anak Yatim Pulau Indah di Klang.

Agensi itu memaklumkan asrama yang bakal menempatkan 150 anak yatim kini sedang dibina dan dijangka siap pada akhir Januari 2026.

"Setakat ini, pembinaan struktur 'wash through' sedang giat dijalankan manakala pemasangan cerucuk untuk dewan serbaguna telah pun siap dinaikkan.

"Yide ingin merakamkan penghargaan kepada penyumbang atas kebersamaan bagi memastikan inisiatif ini terus terlaksana namun dana untuk menyiapkannya masih diperlukan," katanya di Facebook.

Sumbangan boleh dibuat menerusi pautan yide.com.my/infaq-kompleks-anak-yatim/ atau yide.com.my/donat.../infaq-dana-kompleks-anak-yatim/

Ia juga boleh dilakukan menerusi aplikasi Infaq Yide yang boleh dimuat turun di Google Play Store atau Apple Store.

"Setiap sumbangan anda layak mendapat tolakan cukai terhad ke-

pada 10 peratus bawah subseksyen 44 (6) akta cukai pendapatan 1967 melalui resit rasmi Yide," katanya.

Sementara itu, Yide menyediakan pelbagai kaedah bagi memudahkan orang ramai memberi sumbangan infak antaranya melalui akaun bank Islam (1223 4010 0073 30) atau bank RHB Islamic (2626 2500 0114 39).

Selain platform digital seperti TULUS, Toyibpay, Billplz, TouchnGo dan Valuepay, Yide turut menyediakan Kupon Infaq Yatim sepanjang Ramadan dan orang ramai boleh menyumbang melalui amil zakat fitrah yang dilantik Lembaga Zakat Selangor.

Tanggung kos jagaan, ubat perajurit

SHAH ALAM - Lembaga Zakat Selangor (LZS) menyantuni seorang bekas perajurit yang uzur dan berdepan masalah tempat tinggal di sebuah pusat jagaan warga emas, baru-baru ini.

LZS memaklumkan bekas jurutera pesawat tentera itu menghidap penyakit saraf dan sukar bergerak kerana kakinya lemah tetapi tidak mahu menyusahkan anak-anaknya.

"Kos bulanan di pusat jagaan warga emas itu tidak mampu ditanggung beliau yang tidak berpencen serta hanya memperoleh bantuan Jabatan Kebajikan Masyarakat berjumlah RM250 setiap bulan.

"Rakan-rakan perajurit dan persatuan veteran tentera juga sentiasa mengambil tahu keadaannya dan membantu sekadar yang mereka mampu,"

katanya menerusi Facebook.

LZS menambah manfaat agihan zakat diberikan kepada bekas tentera tersebut menerusi perbelanjaan kos jagaan dan perubatan yang akan ditanggung institusi itu.

"Semoga manfaat agihan ini dapat meneruskan semangat juang seorang bekas tentera yang dahulunya menjadi tonggak benteng negara," katanya.

MoU RM1.2 juta, jamin kualiti pelajar

SHAH ALAM - Universiti Islam Selangor (UIS) memeterai memorandum persefahaman (MoU) dan memorandum perjanjian (MoA) dengan penggiat industri bagi menjamin kualiti graduannya dalam bidang pekerjaan.

Unit Komunikasi Korporat UIS memaklumkan MoU melalui Pusat Jaringan Komuniti dan Industri (PJKI) itu ditandatangani bersama empat entiti iaitu Japan Da'wah Centre dan Koperasi Kakitangan Petronas Berhad (Kopetro).

Selain itu, Malaysian Technology De-

velopment Corporation Sdn Bhd dan Persatuan Peruncit Dan Pembekal Bumi-putera Malaysia (Mybursa).

MoA bernilai RM1.2 juta pula dimerterai antara PJKI UIS dengan Mikaza DRG Sdn Bhd ke arah meningkatkan kerjasama dan hubungan dua hala yang baik dengan industri selain menyediakan peluang penyelidikan serta pekerjaan untuk pelajar.

"Antara objektif utama PJKI adalah memastikan setiap graduan UIS dilatih dan bersedia untuk diambil bekerja oleh

mana-mana agensi atau industri dalam bidang berkaitan.

"Melalui pemeteraian ini antara manfaat yang bakal diperoleh kedua-dua pihak termasuklah jaringan penyelidikan akademik, usahasama penyelidikan dan teknologi industri, pertukaran maklumat, penempatan latihan industri pelajar serta inovasi," kata kenyataan baru-baru ini.

UIS juga yakin dan akan meningkatkan lebih banyak kerjasama dengan pihak industri dalam pelbagai bidang tahun ini.



SEMANGAT... Pemain Harimau Malaya memulakan latihan persediaan Piala Asia 2023 di Universiti Qatar pada 2 Januari. Malaysia menentang Jordan dalam perlawanan pertama kumpulan E pada 15 Januari. Foto Persatuan Bolasepak Malaysia

Tiket serendah RM10

Anjur Piala Sultan Selangor 17 Ogos

Oleh NORRASYIDAH ARSHAD

KUALA LUMPUR - Pertandingan bola sepak Piala Sultan Selangor (TSSC) yang tertangguh empat tahun susulan Covid-19 dianjur semula pada 17 Ogos di Stadium Merdeka.

Pengerusi jawatankuasa TSSC berkata 20,000 penonton dijangka memeriahkan perlawanan tradisi menentang Singapura dengan tiket dijual serendah RM10.

Menurut Tan Sri Abd Karim Munisar, lokasi edisi ke-20 ini menggambit nostal-

gia kegemilangan bintang bola sepak negara antaranya Dato' Mokhtar Dahari, R Arumugam, Datuk Santoh Singh dan Datuk Soh Chin Ann.

"TSSC edisi ini amat bermakna sebab kita bawa penonton ke stadium yang melahirkan legenda bola sepak. Stadium mengembalikan sejarah lama kerana mereka beraksi di sini."

"Mereka bantu pasukan kebangsaan hingga kita berjaya ke Sukan Olimpik 1972 dan 1980. Saya rasa peminat bola sepak pastinya tertunggu-tunggu untuk melihat suasana pada 17 Ogos ini," katanya selepas meninjau stadium

berkenaan pada 3 Januari.

Abd Karim berkata perlawanan yang melibatkan dua kategori iaitu veteren dan pilihan turut menampilkan persembahan artis terkenal tanah air Datuk Jamal Abdillah.

"Untuk memeriahkan lagi, kita akan pertunjukkan bunga api selama tiga minit selain pasukan polis membuat persembahan payung terjun dengan membawa bendera Malaysia dan Selangor," katanya.

Kejohanan kali ini menawarkan piala berprestij serta wang tunai RM80,000.

Gilap bakat baharu muay thai

SHAH ALAM - Petarung muay thai negara Muhammad Johan Ghazali Zulfikar berharap Persatuan Muay Thai Malaysia memainkan peranan lebih efektif bagi mencungkil bakat baharu sukan berkenaan.

Beliau yang dikenali sebagai Jojo berkata Malaysia mempunyai ramai atlet berpotensi melangkah lebih jauh tetapi kurang mendapat pendedahan, lapor Berita Harian.

"Kita ramai bakat-bakat yang bagus, cuma mereka tidak dapat peluang yang diperlukan untuk melangkah ke peringkat lebih tinggi."

"Usaha juga perlu dibuat untuk

mencungkil bakat-bakat baharu di peringkat akar umbi supaya kita tidak ketandusan atlet dalam sukan muay thai. Saya percaya kalau kita betul-betul minat untuk memajukan sukan ini, kejayaan akan dicapai."

"Sebab itu, kuasa perlu diberikan kepada orang betul-betul berpengalaman dan berminat untuk melonjakkan lagi sukan ini ke peringkat lebih tinggi," kata atlet berusia 18 tahun.

Menurut Johan, beliau juga mengikuti perkembangan rakan-rakannya termasuklah Mohamad Rifdean Masdor dan Ahmad Nor Iman

Aliff Rakib yang meraih pelbagai kejayaan di pentas antarabangsa.

Katanya, kedua-dua atlet berkenaan berbakat dan berpotensi untuk melangkah ke peringkat tertinggi.

"Macam Rifdean, dia pun orang Sarawak, sangat berbakat. Saya rasa dia pun hanya tunggu masa untuk dapat kontrak ONE Championship."

Johan mencipta sejarah apabila menjadi atlet tempur termuda memperoleh kontrak bernilai AS\$100,000 (RM463,300) dengan ONE Championship pada Oktober dan melakar rekod kemenangan 5-0 sepanjang saingan musim ini.

Beregut harap tuah di laman sendiri

SHAH ALAM - Pemain beregu badminton utama negara berharap dapat melakar keputusan cemerlang di Terbuka Malaysia bagi menyuntik semangat musim 2024.

Aaron Chia berkata beliau bersama gandingannya Soh Wooi Yik perlu bermain lebih konsisten bagi memastikan impian mereka ke Sukan Olimpik 2024 terus menyala.

"Saya memang amat berharap pernampilan kami pada Terbuka Malaysia yang merupakan kejohanan pertama bagi 2024 akan menjadi satu permulaan yang baik buat kami."

"Saya rasa itulah sasaran kami, tetapi saya tak boleh hendak cakap lebih, saya kalau boleh tak mahu ulas pasal sasaran, apa yang penting fokus untuk diri sendiri," katanya lapor Utusan Malaysia pada 2 Januari.

Mereka bertemu gandingan Denmark Rasmus Kjaer-Frederik Sogaard di pusingan pertama Terbuka Malaysia yang berlangsung pada 9 hingga 14 Januari.

Selangor juara liga e-sukan Malaysia

SHAH ALAM - Pasukan E-Sukan Negeri Selangor muncul juara keseluruhan kejohanan Liga Jelajah Juara E-Sukan Malaysia musim pertama yang berakhir pada 30 Disember.

Pertandingan julung kali itu bertujuan memberi pengalaman kepada semua peserta merasai suasana kejohanan bertaraf kebangsaan, lapor Berita Harian.

Ia disertai pasukan Mobile Legend Bang Bang selain kejohanan bola sepak tujuh sebelah di Majlis Sukan Negara (MSN) bermula 25 Disember.

Pegawai Eksekutif MSN Mohd Syazwan Mohd Hanafie menyifatkan kejohanan itu mencapai objektif dalam usaha melahirkan juara baharu dan menjadi pemain e-sukan profesional pada masa akan datang.

Tiada hasrat bida Piala Thomas/Uber

SHAH ALAM - Persatuan Badminton Malaysia (BAM) tidak berhasrat untuk membuat bidaan kepada Persekutuan Badminton Dunia (BWF) bagi menjadi tuan rumah Piala Thomas/Uber 2026.

Setiausaha Agungnya Datuk Kenny Goh berkata badan induk itu akan membuat pernilaian terlebih dahulu sebelum membuat sebarang keputusan, lapor Berita Harian.

"Buat masa ini BAM tidak berhasrat lagi untuk melakukan bidaan bagi menjadi tuan rumah Piala Thomas/Uber 2026. Bagaimanapun, kita tunggu dan lihat terlebih dahulu," katanya pada 30 Disember.

Persoalan mengenai negara mana yang akan menjadi tuan rumah edisi 2026 timbul selepas BWF melanjutkan tempoh bidaan ke 1 Februari.



IR IZHAM HASHIM
Pandan Indah

menyumbang bakul makanan kepada asnaf di DUN beliau



BORHAN AMAN SHAH
Tanjung Sepat

menyambut tahun baharu dengan masyarakat Orang Asli di Bukit Bangkong, Sepang



JAMALIAH JAMALUDDIN
Bandar Utama

mengedar kalender 2024 kepada penjaja dan pengunjung pasar malam di Petaling Jaya



DATUK RIZAM ISMAIL
Sungai Air Tawar

menghadiri pertandingan memancing di kawasan DUN beliau



PAPPARAI DU VERAMAN
Banting

beriadah bersama sukarelawan di Bukit Jugra, Kuala Langat



SYED AHMAD ALHADAD
Lembah Jaya

bersama kakitangan Jabatan Perhilitan selepas memasang papan tanda di Ampang Jaya



LEONG TUCK CHEE
Pandamaran

menyerahkan sumbangan kepada mangsa kebakaran di DUN beliau



IZUAN KASIM
Kota Damansara

bergotong-royong bersama penduduk Pangaspuri Tainia, Petaling Jaya

Jumpa warga emas sebar maklumat

SHAH ALAM - Wakil rakyat Balakong turun padang menyantuni warga emas bagi menyalurkan maklumat berkaitan program bantuan Iltizam Selangor Penyayang (ISP).

Ong Chun Wei mengambil pendekatan uar-uarkan bantuan Skim Mesra Usia Emas (SMUE) berikutan ada warga emas yang tidak mendapat maklumat berkaitan SMUE.



"Seramai 20,000 daripada 104,000 pengundi DUN Balakong warga emas. Saya cuba yang terbaik bagi memastikan mereka menerima manfaat daripada Kerajaan Negeri," katanya pada 27 Disember.

Beliau juga berhubung dengan Perbadanan Kemajuan Pertanian Selangor

bagi menjalankan Jualan Ehsan Rahmah (JER) untuk rakyat mendapatkan barang pada harga murah.

"Jika ada slot untuk adakan JER di Balakong, kami gembira kerana ia mengurangkan perbelanjaan kumpulan berpendapatan rendah (B40)."

"Pusat Khidmat Masyarakat DUN Balakong juga menyalur bantuan kepada golongan memerlukan dengan melakukan lawatan ke rumah," katanya lagi.

Jalin hubungan baik dengan sekolah

Perkenal geran pendidikan tahunan

Oleh SOFIA NASIR

SHAH ALAM - Wakil rakyat Batu Tiga bakal memperkenal geran pendidikan tahunan bermula tahun depan kepada semua institusi pendidikan di kawasan itu.

Daniel Al-Rashid Haron berkata cadangan berkenaan memberi tumpuan kepada pembangunan pendidikan selain menjalin hubungan baik dengan sekolah.

Beliau berharap kertas kerja yang akan dibentang menerusi permohonan geran tersebut dilaksanakan sendiri

oleh pelajar terlibat.

"Di Dewan Undangan Negeri (DUN) ini kita ada 15 sekolah sahaja dan saya bercadang untuk sediakan 15 geran tahunan supaya mereka dapat adakan pelbagai program menarik."

"Saya juga berharap kertas kerja dapat dibentang oleh pelajar supaya mereka diberi pendedahan awal selain merapatkan hubungan antara belia dengan pihak kami," katanya pada 28 Disember.

Daniel juga berikrar untuk terus memantau setiap perkembangan projek yang sedang dan akan dilaksanakan

di DUN berkenaan khususnya projek tebatan banjir.

Selain itu, katanya, pelaksanaan projek pembangunan Hab Logistik Antara bangsa Shah Alam (SAILH) di Seksyen 16 juga dijangka memberi peluang pekerjaan kepada penduduk setempat.

Julai lalu, Dato' Menteri Besar Dato' Seri Amirudin Shari mengumumkan projek pembangunan SAILH di atas tapak seluas 28.73 hektar dengan nilai pelaburan RM2 bilion.

Ia dijangka mewujudkan 5,000 peluang pekerjaan baharu menjelang 2028.

Segera baiki cerun berisiko runtuh

SHAH ALAM - Isu keselamatan cerun di perumahan Cendana, Puncak Bestari, Bandar Puncak Alam, Kuala Selangor dibincang dalam mesyuarat bersama pihak berkepentingan pada 7 Disember.

Pusat Khidmat Rakyat Ahli Parlimen Kuala Selangor memaklumkan masalah tersebut dalam perhatian Jabatan Kejuruteraan Majlis Perbandaran Kuala Selangor (MPKS).

Turut hadir, Persatuan Penduduk Cendana Puncak Bestari, Tetuan Worldwide, Tetuan Guppyunip, wakil Ahli

Parlimen Kuala Selangor serta jabatan teknikal dalam MPKS.

"Mesyuarat ini bagi memastikan keputusan dalam mesyuarat tersebut dilaksanakan. Selain itu bagi menyeraskan isu teknikal pelaksanaan pembaikan dan penyelenggaraan cerun tersebut," kata kenyataan di Facebook baru-baru ini.

Antara cadangan yang perlu dibuat terhadap cerun berkenaan adalah penanaman rumput di kawasan terdedah, pembetulan aliran air di kaki cerun dan membina sistem saliran tambahan.

Selain itu, penyelenggaraan cerun secara berkala juga hendaklah dilakukan dengan mematuhi Manual Garis Panduan Jabatan Kerja Raya Bagi Penyelenggaraan Cerun di Malaysia.

Sebelum ini lebih 100 penduduk perumahan berkenaan berdepan isu keselamatan susulan berlaku pergerakan tanah di penempatan itu sejak 2016.

Difahamkan, masalah berkenaan membabitkan cerun di lorong belakang Jalan Bestari 2/5 hingga mengakibatkan jalan dan struktur rumah di situ retak.

Guna media sosial hebah bantuan

SHAH ALAM - Wakil rakyat Dusun Tua menggunakan media sosial untuk menghebah program bantuan Kerajaan Negeri demi membantu masyarakat di kawasan itu.

Datuk Johan Abdul Aziz menjelaskan kaedah itu lebih pantas, sekali gus membantu lebih ramai masyarakat mendapat manfaat.

"Kerajaan Negeri menyusun 47 program bawah Iltizam Selangor Penyayang

(ISP) yang memberi manfaat kepada rakyat dan menumpukan usaha meringankan beban kumpulan pendapatan rendah (B40).

"Sebagai wakil rakyat, saya akan gunakan semua medium media sosial se lain Pusat Khidmat Masyarakat Dusun Tua bagi memudahkan orang ramai mendapatkan maklumat," katanya.



Beliau turut meminta golongan muda yang mahir teknologi untuk membantu menyampaikan maklumat berkaitan ISP kepada ibu bapa atau masyarakat sekeliling yang tidak mempunyai akses.

Johan berkata pihaknya juga menumpukan usaha menambah baik infrastruktur jalan raya bagi mengurangkan kesesakan di kawasan Dusun Tua.

Tumpu bantu usahawan kecil

SHAH ALAM - Usaha membantu lebih ramai usahawan kecil memajukan perniagaan menjadi tumpuan Ahli Dewan Negeri (ADN) Meru Mariam Abdul Rashid tahun ini.

Beliau menjelaskan pihaknya berhasrat untuk menganjurkan pelbagai program keusahawanan termasuk dialog awam bagi mereka meneroka peluang dan cabaran dalam bidang itu.

"Selain peluang perniagaan, menjadi impian saya sebagai wakil rakyat DUN ini untuk melihat lebih ramai usahawan kecil berjaya mengubah nasib mereka. Kita juga akan cuba bantu urus kedai atau gerai jika diperlukan," katanya baru-baru ini.

Beliau berkata kebajikan dan naik taraf infrastruktur juga terus dipergiat selain melaksana program sisu kepada wang (waste to money) bagi menggalakkan kitar semula.

Atasi masalah jalan terputus

SHAH ALAM - Ahli Dewan Negeri (ADN) Kota Damansara berazam menyelesaikan beberapa isu infrastruktur demi keselesaan warga kawasan itu.

Muhammad Izuan Kasim berkata tumpuan utama adalah menyelesaikan jalan terputus antara Subang Bestari dan Kwasa Land yang tertangguh lebih 15 tahun selain isu kebajikan penduduk pangsapuri.

"Laluan itu sepatutnya disiapkan pemaju namun ia gagal dibina kerana beberapa perkara. Justeru penduduk terpaksa melalui jalan satu hala yang sesak.

"Kita akan duduk berbincang dengan semua pihak supaya pembinaannya dapat dilaksanakan segera. Ia mungkin menelan kos antara RM10 juta hingga RM15 juta," katanya pada 31 Disember.

30,000 penduduk manfaat jualan murah

KLANG - Lebih 30,000 penduduk di Dewan Undangan Negeri Sementa menerima manfaat program Jualan Ehsan Rahmah sepanjang tahun ini.

Ahli Majlis Perbandaran Klang Zon N43C NS Muthumariammah berkata pengajuran program kendalian Perbadanan Kemajuan Pertanian Selangor (PKPS) sentiasa mendapat sambutan menggalakkan daripada penduduk.

"Setiap kali dianjurkan penduduk mesti hadir kerana mahu mendapatkan barang keperluan harian pada harga murah berbanding pasaran.

"Penduduk sanggup datang seawal jam 7.30 pagi untuk mendapatkan nombor giliran. Malah, ada juga yang menyatakan supaya program ini diteruskan kerana membantu meringankan beban," katanya di Dewan Serbaguna Dato' Ahmad Razali pada 31 Disember.

Promosi barang Red Giants hingga 7 Jan

SHAH ALAM - Kelab bola sepak Selangor menawarkan diskaun jualan produk sehingga 70 peratus bermula 3 hingga 7 Januari.

Jualan penghabisan stok itu diadakan di kedai rasmi kelab yang terletak di Pusat Latihan Selangor FC, Seksyen 5, di sini.

"Berita baik untuk semua peminat Gerasi Merah. Kami akan adakan jualan penghabisan stok bermula 3 hingga 7 Januari ini.

"Promosi ini hanya sah secara eksklusif kepada pelanggan yang datang ke kedai rasmi kami di Pusat Latihan Selangor FC. Jumpa anda di sana," menurut kenyataan di Facebook Selangor FC.

TikTok Tourism Selangor jadi rujukan

SHAH ALAM - Aplikasi TikTok Tourism Selangor antara rujukan utama pelancong domestik dan antarabangsa untuk mendapatkan maklumat percutian di negeri ini.

Justeru, pengurus komunikasi korporatnya berkata pihaknya beralih menggunakan 95 peratus usaha promosi lokasi pelancongan secara digital.

"Akaun aplikasi TikTok Tourism Selangor mempunyai hampir 200,000 pengikut dengan jumlah 2 juta kesukaan (likes) selain memperoleh lebih 500,000 yang melihat muat naik (view).

"Ini membuktikan aktiviti promosi melalui platform digital berjaya dengan rata-rata pengunjung akan membuat rujukan terlebih dahulu bagi merancang perjalanan mereka berkunjung ke tempat menarik di Selangor," kata Ahmad Nazri Tashriq Rahmat pada 27 Disember.

Promosi yang giat dijalankan antaranya agropelancongan Sungai Panjang, Rumah Hutan Terapi Alam (Hulu Selangor) Taman Tema Air Splash Mania (Kuala Langat) dan Skyline Luge di Rawang.

Dapatkan tiket edisi khas Taman Botani

SHAH ALAM - Taman Botani Negara Shah Alam (TBNSA) menawarkan jualan tiket edisi khas sempena sambutan tahun baharu.

Menurut TBNSA, tiga pilihan koleksi tiket khas bertemakan botani yang boleh dijadikan penanda buku itu dijual di kaunter TBNSA sejak 1 Januari.

Ia dijual pada harga RM3 bagi dewasa dan kanak-kanak bukan warganegara serta RM5 bagi dewasa bukan warganegara.

"Jom mulakan tahun baharu 2024 dengan gaya hidup sihat dan riang di TBNSA," kata ke-yataan di Facebook.



SEDIA...

Pengerusi Piala Sultan Selangor Tan Sri Abd Karim Munisar (tiga, kanan) bersama ahli jawatankuasa meninjau kerja baik pulih Stadium Merdeka, Kuala Lumpur pada 3 Januari. Foto HAFIZ OTHMAN ► BERITA MUKA 21

Jumlah pelancong setakat September

4.8 juta pelancong kunjungi Selangor

Oleh NAS NORZIELA NASBAH

SHAH ALAM - Bilangan kehadiran pelancong tempatan dan asing di Selangor mencecah 4.8 juta antara Januari hingga September tahun lalu dengan beberapa daerah menjadi tumpuan.

Pengurus komunikasi korporat Tourism Selangor berkata Petaling menerima kunjungan tertinggi sekitar 2.8 juta berikutan tarikan gastronomi seperti kafe dan pusat beli-belah.

"Daerah lain seperti Hulu Selangor

juga menerima peningkatan pelancong sebanyak 244.9 peratus atau 58,353 orang dan Kuala Selangor sekitar 181 peratus atau 48,660.

"Kedua-dua daerah ini antara yang mula menerima kunjungan pelancong tinggi bagi tahun 2023," kata Ahmad Nazri Tashriq Rahmat.

Beliau menambah kehadiran pelancong domestik dari Kuala Lumpur, Johor, Perak dan Pahang menyumbang 38 peratus sementara pelancong luar seperti China, Jepun dan India (46 peratus).

Sebelum ini, EXCO Pelancongan

Dato' Ng Suee Lim memaklumkan Selangor merekod 2.9 juta pelawat dalam tempoh suku kedua 2023 dengan hasil perbelanjaan RM21.9 bilion.

Pada 2022, Selangor mengekalkan rekod nombor satu jumlah kedatangan pelancong domestik dengan catatan 22 juta, jauh lebih tinggi berbanding negeri lain.

Angka itu sekali gus mengatasi Kuala Lumpur di kedudukan kedua dengan mencatatkan 16.9 juta pengunjung diikuti Sarawak (15.5 juta), Perak (14.6 juta) dan Pahang (13.2 juta).

Pelawa peserta U-PLATS mohon geran

SHAH ALAM - Peserta program Latihan Pembangunan Usahawan Plots (U-PLATS) dipelawa memohon Geran Digital Penjaja Madani yang dibuka pada 1 Januari, maklum Menteri Besar Selangor (Pemerbadanan) atau MBI.

Menurut Ketua Tanggungjawab Sosial dan Komunikasi Korporat MBI Ahmad Azri Zainal Nor, geran bawah inisiatif kerajaan pusat menawarkan telefon percuma dan pakej mesin kira

bernilai RM1,000.

"Sempena tahun baharu 2024, ada berita baik untuk peniaga yang berdaftar dengan PLATS. Peserta boleh memohon geran ini yang merupakan inisiatif kerajaan pusat dan kita bantu mempermudahkan urusan peniaga PLATS.

"Keutamaan kepada 360 peserta U-PLATS. Setakat ini peserta U-PLATS seramai 180 orang membabitkan enam pihak berkuasa tempatan (PBT) dan

akan diperluas ke enam lagi PBT," katanya.

Permohonan boleh dibuat melalui laman sesawang platselangor.com. Klik inisiatif MBI, pilih Geran Digital Penjaja Madani dan lengkapkan borang Google yang disediakan.

Pakej tersedia pada mesin kira meliputi sistem perakaunan (bookkeeping), DuitNow, Tap2Phone, pos dan invois, pengurusan inventori serta analisa perniagaan.